

ANG BINHI DILI MANUNUNOD

NGA UBAN ANG TIPAKA



Magpabilin kita sa pagtindog sa makadiyut alang sa pag-ampo. Iduko nato ang atong mga ulo.

² Minahal nga Dios, ginaisip namo kini nga usa ka dakung pribilihiyo, karong gabhiona, nga maania niini nga okasyon, aron dalhon ang usa ka buhi nga Cristo ngadto sa usa ka himalatyon na nga kalibutan ug usa ka himalatyon na nga henerasyon.

³ Ginapangamuyo namo, Ginoo, nga dihogan Mo ang among mga pulong ug ang among mga pagpaningkamot, aron dili kini magabalik Kanimo nga walay-kapuslanan, kondili mamatuman unta niini kung unsay katuyoan niini.

⁴ Tabangi ang matag lalaki, babaye, batang lalaki, o batang babaye, nga nagkinahanglan, dinhi karong gabhiona. Ug, Amahan, nasayod kami nga nagkinahanglan gyud kaming tanan. Ug pagmopauli na kami, niining gabhiona, hinaut nga mabati namo sa among mga kasingkasing ang sama niadtong mga naggikan sa Emmaus, human nga . . . nga ilang nasaksihan ang pagkabanhaw ni Cristo, nga nagaingon, “Dili ba ang atong mga kasingkasing nagdilaab man sa sulod nato samtang nakigestorya Siya kanato diha sa dalan?” Itugot kini, Ginoo.

⁵ Ayoha ang mga may sakit ug mga nagaantus. Hinaut nga wala na’y mga maluyahon sa among taliwala human sa panerbisyo karong gabhiona. Ug labaw sa tanan, hinaut nga wala na’y usa ka dili-magtotoo ang mahibilin, Ginoo. Hinaut nga managpanoo silang tanan paingon sa Kinabuhing Walay Katapusan, tungod mao man kana ang among katuyoan sa panagtigum dinhi.

⁶ Ginapangamuyo namo kini nga mga panalangin alang sa kadungganan sa Gingharian sa Dios, sa Ngalan ni Jesus Cristo, ang Anak sa Dios. Amen.

Makalingkod na kamo.

⁷ Pagkaanindot, nga makabalik dinhi, karong gabhiona. Ug nakita ko nga adunay pipila nga nagatindog sa palibot, ug siguro nakakonekta na ang—ang mga telepono karon, ngadto sa daghang nagkalainlaing mga siyudad sa tibuok nasud; sa San Francisco, Tucson, og didto sa sidlakan. Ug ginapadangat nato, pinaagi sa telepono, ang mga pagpangumosta kanila. Ania kita sa awditoryum karong gabhiona. Ug napuno na ang pinaka-punoang bahin sa awditoryum, ug ang mga pasilyo; ug bisan

dinha sa mga bungbong, puno na pud og nanagtindog nga mga tawo. Ug sa hingsayran nato nga ugma sa gabii paningkamotan namong ablihan ang usa pa ka bahin dinhi, paingon sa gym, ug mag-abang og mas daku-daku nga awditoryum nga mapasigo ang pipila pa ka libo nga mga tawo. Busa ginalauman nato kana, ugma sa gabii. Kung napuno man kini karong gabhiona, sa unang gabii, aba, nagatoo kita nga mas daghan pa gyud ugma sa gabii. Ug nakita ko nga nagdugang na gani, sila og mga lingkoranang usab, ug tanan na, karong gabhiona.

⁸ Nagahinam-hinam gayud kita; una, sa Pag-abot ni Ginoong Jesus; sunod, sa kaluwasan sa . . . sa nahisalaag nga mga kalag nga modawat Kaniya karong gabhiona ug mamahimong andam alang sa Iyang Pag-abot pagmotungha na Siya.

⁹ Gusto kong maghatag og espesyal nga pagpangumosta ug pagdapit sa tanan niining maayong mga kalalaken-an sa entablado, nga sa nahibaloan ko daghan kanila ang mga ministro. Duha ka gatus, o sobra pa, nga ania sa entablado, ug nagapasalamat gayud kita nga ania sila.

¹⁰ Kaninyong tanan, kon asa man kamo, sa nagkalainlaing bahin sa nasud. . . Ug hingsayran ko nga ang pipila nga ania dinhi gikan pa sa ubang nasud, gawas sa nasud. Busa mapasalamaton kami nga ania kamo aron makaambit niining pagpakig-fellowship uban kanamo, nga ginahinam-hinam natong igahatag sa Dios kanato atol niini nga panagtigum.

¹¹ Daw sa, sukad niadtong naghunahuna ko nga mobalik para niining pipila ka adlaw nga panagtigum, nakuyawan og ayo ang kasingkasing ko tungod sa dili-maisip nga pagbati nga aduna gyu'y sa kung unsang butang nga mahitabo. Wala ako masayod kung unsa man kini, apan nagalaum ko nga usa kini ka dakung kapadayagan gikan sa Dios, nga—nga magaandam kanato ug magpahimo kanato nga mas maayo nga mga lungsoranon sa Iyang Gingharian samtang nagalakaw kita dinhi niining mangitngit nga kalibutan sa sala ug dili-pagtoo.

¹² Kini nga luna karong gabhiona, kini nga dapit mismo, usa gayud ka mahinungdanon nga butang para kanako. Sukad man gud niadtong hingsayran ko nga gitukod nila dinhi kini nga awditoryum sa eskwelahan, gitinguha ko na nga makapahigayon unta og usa ka panerbisyo sa niining dapit. Nagapasalamat kaayo ko sa hunta sa eskwelahan ug kanila nga maabiabihon nga nagtugot kanato nga magamit kini.

Dinhi niini nga dapit, mismo kon diin gitukod kini nga bilding karong gabhiona, nahitabo ang usa ka mahimayaang butang mga traynta ka tuig na ang milabay, sa niining mao ra nga luna mismo. Walay lain kini kondili usa pa lang ka kasagbotan niadtong panahona. Ug nagpuyo ako kaniadto sa usa ka gamay'ng balay sa unahan lang dinhi, mga duha ka gatus ka yarda. Nabalaka gayud ako niadtong nga panahona mahitungod

sa kaluwasan sa akong amahan ug inahan. Nga, karong gabhiona parehong wala na. Ug ilabina na, niadtong panahona, nabalaka gyud ko sa akong amahan. Mahinumduman ko, nga natulog ako niadto sa balkonahe. Mainit kaniadto, og panahon sa ting-init.

¹³ Nahisulat kini, siguro, sa hamubong basahon nga gitawag nga *Si Jesus Cristo Mao Sa Gihapon Kagahapon, Karon, Ug Hangtud Sa Kahangturan*, o kaha anaa kini sa hamubong basahon nga gitawag nga *Wala Ako Nagmasupilon Sa Langitnong Panan-awon*.

¹⁴ Ug samtang nagahigda ko kaniadto sa balkonahe, kalit ra kong nakamata, ug may kabug-aton sa akong kasingkasing para sa akong amahan. Nga, daghan kaninyong mga tawo nga taga-dinhi sa siyudad ang nakaila sa akong amahan. Sa hunahuna ko usa siya ka halangdon nga tawo, bisan pa nga usa siya ka makasasala. Ug, aduna siya'y di-maayo nga bisyo, nga gipaningkamotan kong batokan kadto nga butang kutob sa akong mahimo, sa nangaging mga panahon, kanang, pag-inom og wiski. Ug niadtong gabhiona nag-inom-inom siya. Ug nakamata ko nga may dakung kabug-aton sa akong kasingkasing para kaniya. Ug ingon nga naka-pajama lang, nagsul-ob ko og karsones, og gipabilin ra nga sul-ob ang akong sinina pangtulog; naglakaw-lakaw ako sa niining kasagbotan kaniadto, sa kon asa kini mismo natukod karon, ug miluhod ako aron iampo ang akong amahan.

¹⁵ Ug samtang nagaampo ako ug nangamuyo sa Dios nga luwason siya ug dili itugot nga—nga mamatay siya nga usa ka makasasala, tungod nga gimahal ko gayud siya; ug samtang nagaampo ako, mitindog ako aron mohangad ngadto sa sidlakan gikan dinhi, ug dihay usa ka panan-awon. Ug atua nagatindog sa ibabaw lang nako mismo, si Ginoong Jesus, daghan kaninyo ang nasayod na sa maong panan-awon.

¹⁶ Bueno, dili ingon nga dili ako uyon sa mga ilusyon, sa nahibaloan ko. Apan tinuod man ang mga panan-awon. Ug atua nagtindog si Ginoong Jesus, kadto ang unang higayon nga nakita ko Siya sa ingon niadto nga matang sa panan-awon. Siya'y tingali'g, oh, mga napulo lang ka piye ibabaw sa akong ulo, atua sa kahanginan, nga ginatikang ang usa ka tiil. Nagsul-ob Siya og usa ka maputi nga bisti, nga may borlas nga nagapalibot sa kilid niini. Aduna Siya'y buhok nga hangtud sa Iyang mga abaga. Mora Siya og, kadtong Lalaki nga sama sa gisulti sa Biblia mahitungod Kaniya, nga mga trayntahon. Apan, gamay, niwangon nga Lalaki, gamay kaayo, mora'g dili ra gani Siya motimbang og sobra sa usa ka gatus ug traynta ka libra.

¹⁷ Ug mitan-aw ko, ug nahunahuna ko nga adunay butang, nga tingali'g nasayup ra ko. Busa ako—gilugod ko ang akong mga mata ug—ug mihangad pag-usab. Ug nagtindog Siya nga medyo patakilid, medyo nakatakilid ang Iyang nawong. Ug ang hitsura

sa Iyang nawong, nga kanunay ko nang nakita sa mga pananawon, sama gayud sa kang Hofmann nga drowing nga ulo ni Cristo sa edad nga traynta. Mao kana'y hinungdan nga aduna ko niana sa akong balay, sa akong literatura, sa kon asa ko man mabutang kana, tungod kay ingon niadto man ang hitsura niini, halos pareho gayud niana. Apan, medyo gamay lang Siya.

¹⁸ Ug samtang nagahangad ako Kaniya, nakahunahuna ko, “Dili man kana siguro ang akong Ginoo ang akong ginatan-aw dinha.” Ug moingon ko, nga medyo, naka *ingon niini* ang akong posisyon, ug tingali'g kon asa mismo *kining*, nahimutangan niining pulpito karon. Sa kon asa man, anaa kini mismo sa palibot dinhi, nga, may gilay-on sa kon asa ako nagatindog, kutob sa mahimo kong mabanabana, nga anaa sa kuwarenta o singkwenta ka yarda sa palibot niini nga dapit dinhi, niini nga luna.

¹⁹ Ug mihangad ako, ug nagtindog Siya didto. Ug gipaak ko ang akong tudlo, aron mahibaloan kung tulog ba gyud ko. Kabalo na mo kung unsaon ninyo. . . Daw sa dili gayud puede nga mamaingon niadto kadto. Ug batan-on pa lang ako diha sa Ginoo kaniadto, mga unom pa lang ka bulan nga ako nagawali. Gipaak ko ang akong tudlo. Mikuha ako og sanga sa tanum nga sedge ug gibali kadto. Ug daghan kaninyo nga mga tawo nga nagapuyo sa probinsya, ang nasayod kung unsa kanang gamay'ng igpangiki, kon tan-awon, nga anaa sa sanga sa sedge. Hinay-hinay kong giusap kadto. Ug miingon ko, “Kini—dili kini mamahimo. Nagadamgo ra ako. Atua man ang akong balay. Atua man si papa, si mama, ug ang mga bata usab. Atua usab didto ang lim-aw duol sa karaang bato nga balay nga natukod dinhi kaniadto, kon diin ako nagapangayam niadto og mga pato, mga duha lang ka gatus ka yarda ang gilay-on niini. Ug ania ako nga nagatindog sa kasagbotan; sigurado gayud nga nagadamgo ra ko.”

²⁰ Mipatid ko sa yuta, medyo gibundak ang akong mga tiil, ug gilingo-lingo ang akong ulo, ug—ug gipislit ang akong mga kamot, mihangad ko pag-usab; milantaw sa halayo, mihangad pag-usab, ug atua Siya gihapon, nga nagtindog didto. Ug misugod sa paghaguros ang hangin, ug nakita ko nga ginapalid-palid ang sanga sa sedge. Ug sugod nga mihaguros ang hangin, ang Iyang bisti ginapalid pud niini. Sama sa mga sinina nga nakahayhay sa hayhayan, hinay-hinay kadto nga—nga ginapalid. Nagatindog Siya didto. Gitan-aw ko kadto.

²¹ Ug sa hunahuna ko, “Kung makita ko lang unta ang Iyang nawong!” Ug nagatan-aw Siya sa sidlakan, sa *niini* nga direksyon mismo. Mitan-aw Siya niadto, pag-ayo. Ug misibog ko, aron motikang, para makita sa haduol ang Iyang nawong. Ug wala ko gihapon Siya nakita og ayo. Anaa sa atubangan Niya ang Iyang mga kamot, nga medyo natago kon diin ako nagatindog.

²² Misibog na usab ko. Ug nangigham ko, nga mora'g ingon niini, ingon, “hum,” aron hibaloon kung maawhag ko ba ang Iyang pagtagad. Apan wala gyud Siya milihok.

²³ Dayon nahunahuna ko, “Siguro tawgon ko na lang Siya.” Sa pag-ingon ko, “Jesus,” milingi Siya. Ug sa dihang mitanaw na Siya kanako, gipataas lang Niya ang Iyang mga kamot. Mao lang kana ang akong mahinumduman. Tungod, halos pabanagbanag na man niadto, naghigda na ako dinhi mismo kon diin nahimutang kini nga lugar karon, sa may kasagbotan; nahumod og ayo sa luha ang akong sinina pangtulog, tungod nga nagsige ko'g hilak. Ug nakatulog na ko.

Ang Iyang nawong adunay mga kinaiyahan nga walay pintor nga makahimo—makahimo sa pagdrowing o paghulagway man lang niadto. Dili nila mahimo kadto. Mora Siya og usa ka Lalaki nga, kung tan-awon mo Siya, gusto Niyang mohilak tungod sa kalooy, ug pagrespeto nga may pagtahod; ug bisan pa niana adunay igong gahum nga, kon mosulti, mabaliktad gayud ang kalibutan. Ug ang maong mga kinaiyahan dili gyud mahulagway sa usa ka pintor.

²⁴ Ug hangtud niining adlaw wala gihapon ko masayod kung unsay buut ipasabot niadto. Apan ania ako niining gabhiona, human sa traynta ka tuig, nagatindog sa usa ka awditoryum nga napahinungod karon para sa pagpangalagad sa Dios nga Makagagahum-sa-tanan. Ug ako, nga usa—usa lamang ka ordinaryong miyembro, sa tinuod lang, usa—usa lamang ka lokal nga anciano kaniadto sa—sa iglesiang Baptist dinhi, nga si Roy Davis pa ang pastor niadtong panahona. Ug nagatindog ko dinhi karon nga napuno gayud ang maong bilding, sa mao ra mismo nga luna, nga may. . . nga sa hunahuna ko, gipalit sa Dugo ni Jesus Cristo Mismo, sa akong mga kamot, aron ihatud kining upat-ka-adlaw nga Mensahe sa Ginoo.

²⁵ Mga unom ka bulan lang human niadto, gipahigayon ko ang akong unang pagbautismo dinha dapit sa suba, kaniadtong mikunsad ang Kahayag dinha mismo sa Spring Street. Tingali'g daghan kaninyo nga mga tawo ang gustong moadto didto ug tan-awon kadto, sa Spring Street ug sa suba, duol mismo sa maong suba. Ug didtong lugara unang, nagpakita sa publiko ang Manulonda sa Ginoo, sa alas dos ang takna, usa ka hapon niadto. Ug usa ka Tingog ang naggikan niadto, miingon, “Maingon nga si Juan Bautista gipadala aron sa pag-andam sa unang pag-abot ni Cristo, ang imong Mensahe mao ang magauna sa ikaduhang Pag-abot.”

²⁶ Kini'y traynta ka tuig na ang milabay, ug ania gihapon ako, karong gabhiona, nga ginasangyaw ang maong Mensahe. Ug mikaylap Kini sa tibuok kalibutan, ug malipayon ako nga makabalik sa kaugalingon kong lungsod, karong gabhiona, aron irepresentar kining Ginoong Jesus Cristo nga sa gihapon akong

gimahal sa tibuok kong kasingkasing. Sa matag adlaw samot pa Siya ka hiligugmaon kay sa nangaging adlaw. Wala gyud ko'y giusab bisan usa ka tipik sa akong Doktrina. Ang unang butang nga gisugdan ko, ginatoohan ko sa gihapon ang mao mismong butang niining gabhiona. Siya mao sa gihapon kagahapon, karon, ug hangtud sa kahangturan. Karon aduna ko'y Mensahe nga tulubagon ko.

²⁷ Kaniadtong unang nagsugod ang Mensahe, kini'y, siyempre, ang tanan; nanag-ampo para sa mga may sakit, dunay dagkung mga ilhanan, katingalahan, ug mga milagro. Nagsugod kadto, ilabina sa mga Pentecostal, ang usa ka pangtibuok-kalibutan nga rebaybal sa dagkung mga buluhaton sa pagpang-ayo nga mikaylap sa kalibutan. Sulod sa tibuok kinse ka tuig nagkaaduna gayud og mga rebaybal diha sa matag bungtod, sa tan-aw ko, mga nagadilaab nga kalayo sa rebaybal. Sa tinuod lang minilyon ang midawat kang Cristo ingon nga ilang Manluluwas, pinaagi nianang usa ka sugo. Tungod niana, nagpadasig kadto, kang Oral Roberts, ug sa uban pa, ug sa tanan na, samtang nagakaylap kadto.

²⁸ Pagkahuman, nga nalukapa nga daw patay na ang iglesiang Pentecostal, sama sa kung unsa kini kaniadto. Ang akong tumong ug tinguha, karong gabhiona, mao'y aron pukawon kana nga iglesia, pag-usab, alang sa haduol na nga Pagbalik ni Ginoong Jesus. Kinahanglan ko kining badlongon. Kinahanglan kong sawayon ang sala sa kung unsa man nga matang kini. Wala ko ginatuyo kini sa denominasyon ni kinsa man. Aduna man ko'y usa ka Mensahe.

²⁹ Bueno, malisud nga makasulod sa usa ka iglesia para mopaluyo kanimo, sama lang kaniadto sa atong Ginoong Jesus, tungod Siya man kini; dili ako. Apan sa dihang nagwali Siya kaniadto, ug nag-ayo og mga may sakit, nagbanhaw og mga patay, ug gihinloan ang mga sanlahon, ug nagpagula og mga yawa, gitinguha Siya sa tanan. Apan moabot ang punto diin adunay Mensahe nga kanunay'ng naganunot sa matag ilhanan, tungod aduna ma'y tingog ang ilhanan.

³⁰ Mao nga sa dihang milingkod na Siya usa niadto ka adlaw, ug miingon, "Ako ug ang Akong Amahan Usa ra," lagpas na kadto sa mahimo nilang toohan. Nahitabo, usab, nga sa dihang miingon Siya, "Gawas kon mokaon kamo sa unod sa Anak sa tawo ug moinom sa Iyang Dugo, wala kamo'y Kinabuhi diha kaninyo."

³¹ "Unsa?" Aba, miingon siguro ang mga doktor ug maayo'g-pangisip nga mga tawo kaniadto, "Kining Tawhana usa gayud ka tawong bampira, nga gapaninguhang pakan-on kamo sa Iyang unod ug paimnon sa Iyang Dugo." Wala Niya kadto gihatagan og katin-awan. Gisulti lang Niya kadto.

³² Ug karong gabhiona tingali'g makadungog kamo og mga butang, ug hangtud sa pagtapos sa panagtigum, nga basta na lang nasulti. Tingali'g dili na namo mahatagan og katinawan. Apan, hinumdumi, nga si Jesus Cristo mao sa gihapon kagahapon, karon, ug hangtud sa kahangturan. Nagatoo kita niana.

³³ Karon, wala na kita'y panahon para maghisgot pa og dugang, tungod aduna man kita'y pihong oras para sa pagsugod dinhi ug pihong oras usab para sa pagpanggawas. Ug gusto natong tahuron ang hunta sa eskwelahan nga naggahin niini nga mga oras para kanato, ug buhaton nato ang tanan nga mahimo nato aron tahuron sila.

³⁴ Hinumdumi, sa unsa mang orasa nga gustong moduol ang usa ka makasasala nganha kang Cristo, ang kinahanglan mo lang buhaton moduol mismo, kon ako ma'y nagawali, nagakanta, kon unsa man, ug itugyan ninyo ang inyong kinabuhi kang Cristo sa gilayon, og tindog lang sa inyong gilingkoran. Mao kana'y hinungdan nga ania kami dinhi, aron tabangan kamo.

³⁵ Gusto kong estoryahon si Igsoong Vayle, Igsoong Rober- . . . Borders, ug ang mga kaigsoonan dinhi. Kung . . . Nahunahuna ko kung dili man sila makapahigayon, sa iglesia, inig ka hapon, o inig ka buntag, o kung unsa man, og panerbisyo sa pagtudlo para sa mga nagatinguha og bautismo sa Espiritu Santo. Okey lang ba kana, kaninyo mga igsoon? Si Igsoong Neville ug kamong tanan puede man nga moadto didto, ug si Igsoong Capps pud. Kung aduna ma'y si bisan kinsa nga gustong matudloan bahin sa bautismo sa Espiritu Santo, nganong dili na lang mo moadto sa tabernakulo . . . Unsa ma'y pinakamaayo, sa buntag o sa hapon?

³⁶ [Adunay nagaingon, "Buntag."—Ed.] Sa buntag, mga alas-diyes? Mga alas-diyes sa buntag.

³⁷ Kung aduna man mo'y pangutana mahitungod sa Doktrina, kung aduna mo'y pangutana mahitungod sa Mensahe, kung kamo—kung gusto ninyong . . . kon wala pa kamo naalagaran, sa personal, kon gusto n'yong maiampo, o kon unsa man nga gusto n'yong mahibaloan sa ingon niana nga matang, nganong dili na lang mo modalikyat didto sa alas-diyes sa buntag ug makigkita niini nga mga kalalaken-an. Aduna ma'y usa o daghan kanila ang anaa didto aron magtudlo, aron mag-ampo para sa mga may sakit, aron motubag sa mga pangutana. Sama lang sa usa ka kawani, bueno, siya . . . Moduol lang mo kanila, ug malipay gayud sila nga motabang kaninyo sa unsa mang paagi nga mahimo nila.

³⁸ Karon, sa dili pa kita moduol sa Pulong, gusto natong moduol pag-usab sa Tagsulat sa Pulong. Mahimong makakaon mo og sobra; mahimong makainom mo og sobra; mahimong makatawa mo og sobra; mahimong makalakaw mo og sobra; apan dili gayud kamo makaampo og sobra. "Ginatinguha ko nga

ang mga tawo manag-ampo sa tanang dapit, nga managbayaw sa mga kamot nga balaan nga walay pakiglalis o kaligutgot.”

Mag-ampo kita.

³⁹ Minahal nga Jesus, Tagsulat sa Pulong sa Kinabuhi, ug Ikaw kana nga Pulong, maalampoon kami karon nga nagaduol Kanimo human sa paghatag og katin-awan sa maong pananawon. Nga, Dios, ginapamatud-an Mo ako nga tinuod kana. Ginoong Jesus, ginaampo ko nga dihogan Mo ang mga pulong karong gabhiona nga mapatalinghugan sa matag igdulongog nga anaa ilalum sa Balaanong tingog. Ug kung aduna ma’y pipila dinhi, o nagapaminaw, sa tibuok nasud, kung dili pa sila andam ug nahandam niining taknaa aron atubangon ang hagit sa niining panahon, ang Mensahe gikan sa Dios, aron maghinulsol ug mahimong andam, kay haduol na ang Ginharian sa Dios. Ginaampo namo nga mahitabo unta kana, karong gabhiona, diha kanila, nga atubangon nila ang hagit niining taknaa.

⁴⁰ Oh Dios, nagaampo ako og tabang, ingon nga hingsayran ko ang responsibilidad ug kung unsay buut ipasabot niini, ug kung unsa man ang kinahanglan kong panubagon sa Adlaw sa Paghukom, sa tanan kong ginasulti dinhi ug sa kung asa pa man. Tabangi ako nga mahimong matinud-anon gayud, Ginoo, sa tanan kong ginabuhat o ginasulti sa Imong Pulong, aron nga mamunga Kini. Kay, maingon sa Imong sugo, “Ayaw ibulag kining Pulong sa imong baba; hinonoa magpalandong ka niana, sa adlaw ug sa gabii, aron himatngonan mo sa pagbuhat ang tanan nga nahisulat sa kasugoan. Ug sa ingon niana ikaw magmauswagon sa imong panaw, ug unya makab-ot mo ang kauswagan. Wala Ko ba ikaw sugoa? Magmakusganon ka ug magmaisug, kay ang Ginoo nga imong Dios magauban kanimo bisan asa ikaw paingon.” Ginoong Jesus, buhata ang ingon niana, karong gabhiona. Nagaampo kami sa Ngalan ni Jesus. Amen.

⁴¹ Sa Biyernes ug Sabado, gikan sa alas-diyes hangtud alas-dose, didto sa tabernakulo sa 8th ug Penn Street, adunay mga pagtudlo, mga tubag sa doktrina, mga pag-ampo para sa mga may sakit, ug uban pa. Adto lang mo kung aduna kamo og unsa man nga pangutana, og unsa man nga gikinahanglan ninyo. May mga kalalaken-an didto nga—nga magdumala niana. Panalanginan kamo sa Ginoo.

⁴² Karon, para sa pagsugod niining buluhaton karong gabhiona, wala ko’y unsa man nga mabuhat gawas sa pagsugod niini diretso mismo sa atong Mensahe. Mao kana’y hinungdan nga ania kita dinhi, ug bueno mao pud kana’y hinungdan nga mibalik ako.

Ug Dominggo sa buntag, kon itugot sa Ginoo, gusto kong atubangon kanang dakung hagit sa niining panahon, ang mahitungod sa *Kaminyoong Ug Panagbulag*.

43 Karon, diha sa Mga Taga-Galacia 4:27, gusto kong basahon kining mga Pulong, 4:27 hangtud 31, lakip tanan.

Kay nahisulat kini, Maglipay ka, ikaw nga apuli nga wala mag-anak; tumiyabaw ug suminggit ka, ikaw nga wala manganak: kay ang gibiyaaan adunay labi pang daghan nga mga anak kay kaniya nga aduna og bana.

Karon kita, mga igsoon, sama kang Isaac, mga anak sa saad.

Apan ingon kaniadto nga siya nga gipanganak sumala sa unod naglutos kaniya nga gipanganak sumala sa Espiritu, mao man usab ang kini karon.

Apan unsa ba'y giingon sa kasulatan? Isalikway ang babayeng-ulipon ug ang iyang anak: kay ang anak sa babayeng-ulipon dili makapanunod uban sa anak sa babayeng may kagawasan.

Busa, mga igsoon, kita dili mga anak sa babayeng-ulipon, kondili sa babayeng may kagawasan.

44 Igadugang unta sa Ginoo ang Iyang mga panalangin sa pagbasa sa Iyang Pulong. Karon, siguro ang gipili ko nga teksto nga sama niini, lahi, og talagsaon gayud. Apan usahay makaplagan nato ang Dios diha sa lahi'g, talagsaon nga mga oras, talagsaon nga mga pamaagi, talagsaon nga mga butang, tungod kay talagsaon man ang Dios. Ug ang mga tinuod gyud nga nagapangalagad Kaniya sa ilang kasingkasing, nagapangalagad pud Kaniya sa usa ka talagsaon nga pamaagi, kumpara sa mga butang o sa mga pamaagi nga iya sa kalibutan. Kini nga teksto gitawag nga: *Ang Binhi Dili Manununod Nga Uban Ang Tipaka.*

45 Nagahisgot si Pablo dinhi mahitungod sa literal nga binhi nga duha ka anak ni Abraham. Si Pablo, malipayon, nga ginapahimutang ang iyang kaugalingon diha sa posisyon sa pagkahimugso nga gikan sa babayeng may kagawasan.

46 Karon, nasayod man kita nga si Abraham adunay duha ka anak, gikan sa duha ka managlahi nga babaye. Gihatagan sa Dios si Abraham kaniadto og usa ka saad kang Sarah, pinaagi ni Sarah, diay, nga adunay mahimugso nga usa ka Anak, ug pinaagi niini nga Anak pagapanalanginan ang kalibutan. Ang tanang mga kanasuran pagapanalanginan tungod niini nga Anak. Ug kini'y kasagaran gitooan, ilabina sa mga Judio, nga kini mao si Isaac, apan dili. Kining gikasaad nga Anak ni Abraham mao si Jesus, ug Siya mao ang Harianong Binhi nga saad, kang Abraham. Apan si Abraham ingon nga nakabaton og duha ka anak . . .

47 Ang usa, pinaagi—pinaagi kang Hagar, nga ulipon sa iyang asawa; usa ka matahum, maanyag, nga ulipon nga taga-Egipto nga gikuha ni Abraham didto sa Egipto para sa iyang asawa,

aron mahimo niyang . . . ulipon sa iyang asawa. Ug si Sarah, nga naghunahuna nga dili arang matuman sa Dios ang tanan Niyang saad, iyang giingnan si Abraham nga kuhaon si Hagar, nga iyang ulipon, ug minyoan kini, (diin, ang pagpangasawa og daghan legal man niadtong panahona) ug aron mahimugso ang maong anak; ug sa ingon niadto kono nga paagi ang pagplano sa Dios, nga makabaton siya og anak pinaagi lamang ni Hagar. Apan hingsayran nato nga dili kadto ingon niana.

⁴⁸ Karon atong hingsayran, usab, nga nagakahingpit ang Dios sa tutulo. Bueno, ang Dios “nagakahingpit” sa *tutulo*. Ang *lima* mao ang “grasya”. Ang *pito* mao ang “pagka-kumpleto,” sama sa kalibutan.

Nagakahingpit ang Dios sa Amahan, Anak, Espiritu Santo. Mao kana ang kahingpitan sa Pagka-Dios. Usa ra gyud ka Dios, sa tulo ka kapadayagan, nga tulo ka kinaiyahan sa usa ra ka opisina, o tulo ka opisina sa usa ka Pagka-Dios.

⁴⁹ Bueno, aduna usab og tutulo paingon sa kahingpitan, nga mga ang-ang sa grasya, para sa Iglesia; pagpamatarung, pagpabalaan, og bautismo sa Espiritu Santo. Mao kana ang nagalangkob sa Bag-ong Pagkahimugso, sama lang sa natural nga pagkahimugso nga gikatipo niini. Nga, ang babaye pag ginapanganak na niya ang bata, ang unang butang ang nagagawas mao ang tubig, dugo, ug pagkahuman ang kinabuhi.

Miingon ang Biblia, diha sa Unang Juan 5:7, o 7:5, nagatoo ko nga mao kana, nga miingon, “Adunay tulo nga nagapamatuod sa Langit; ang Amahan, ang Pulong,” nga mao ang Anak, “ug ang Espiritu Santo; kining tulo Usa ra. Adunay tulo nga nagapamatuod sa yuta;” ang Pulong, “ang tubig, dugo, ug Espiritu. Tubig, dugo, ug Espiritu; *nagakahi*usa kining tulo.”

⁵⁰ Karon, ang Amahan, Anak, ug Espiritu Santo, Usa ra. Dili mo mahimong maangkon ang Amahan nga wala ang Anak; dili mo usab mahimong maangkon ang Anak nga wala ang Espiritu Santo. Apan mahimo ra kang mapamatarung nga dili gipabalaan; mahimo ra pud kang mabalaan nga dili napuno sa Espiritu Santo. Napamatud-an na nato kana pinaagi sa kinaiyahan.

⁵¹ Karon, ug daghan kaninyo, siguro, tingali’g lahi ako kaninyo. Ug ako—wala man ako’y edukasyon; sigurado ko nga nahibaloan n’yo na. Apan nagatudlo ako diha sa mga tipo, ingon nga nagakatipo ang natural sa espirituwal.

⁵² Karon, nahibaloan nato nga adunay tutulo sa kahingpitan. Nagakahingpit ang Dios sa tutulo, kaniadto. Ug mao kadto, ang sa kahingpitan sa binhi ni Abraham, si Ismael, Isaac, og si Jesus. Si Ismael nga naggikan sa babayeng-ulipon, si Isaac nga naggikan sa babayeng may kagawasan, ug pareho sila nga pinaagi sa pagpakighilawas; apan si Cristo Jesus naggikan sa ulay, nga walay pagpakighilawas.

⁵³ Dinhi, ang maong “Binhi,” ang usa, usa ra ka Binhi; dili mga binhi, kondili usa ra ka Binhi. Kining uban pa dili na binhi nga iya ni Abraham, tungod kay ang “Binhi” ni Abraham nga gihisgotan sa Dios mao man ang iyang pagtoong Binhi, dili ang iyang natural nga binhi. Tungod, human nga namatay si Sarah, nakigminyo man si Abraham sa usa na usab ka babaye ug nakabaton pa og pito ka anak nga mga lalaki, gawas sa mga anak nga babaye. Busa dili kadto mamahimo nga mga binhi ni Abraham, kondili nagapahinungod kadto sa “Binhi” ni Abraham, nga usa ra. Ug mao kadto ang pagtoong Binhi ni Abraham, nga nagapahinungod sa Harianong Binhi nga moabot pinaagi sa pagtoo ni Abraham; dili nga sa natural nga kinabuhi ni Abraham, kondili sa espirituwal nga kinabuhi ni Abraham; nga giisip ang tanang butang nga sukwahi sa Pulong sa Dios ug gitawag kini nga dili ingon niana, ug mitoo sa Dios; batok sa paglaum, apan mitoo tungod sa paglaum. Ingon niana ang tinuod nga Binhi nga atong ginahisgotan.

⁵⁴ Dinhi gipresentar kanato ang usa ka hulagway. Oh! Nagsugod ang maong binhi, ang binhi sa saad, nagsugod kini nga medyo giduhaduhaan, ang pagduhaduha sa orihinal nga saad. Kita n’yo kung unsa nga nagsugod kini sa ubos, diha sa pagduhaduha sa orihinal nga saad. Nagsaad ang Dios kang Abraham, pinaagi ni Sarah, nga makabaton siya niini nga anak. Apan karon matikdi, miabot ang unang binhi ni Abraham pinaagi sa babayeng-ulipon tungod sa pagduhaduha ni Sarah kon mahitabo ba gyud kini, tungod kay tigulang na man gud siya ug lagpas na sa edad sa pagpanganak.

⁵⁵ Karon sa ingon niana nga paagi usab nagsugod ang iglesia. Sa ingon niana nga paagi ang pagsugod niini sa kanunay. Magsugod gyud ka sa ubos. Wala ka nagasugod sa ibabaw. Ang tawo nga gapaningkamot nga mokatkat sa hagdanan, nga nagasulay nga mokatkat una sa ibabaw, mabali gyud ang iyang liog. Kinahanglan mo uná nga magsugod ug dinha ka na sugod pataas.

Ug ania hingsayran nato ang sinugdanan sa saad sa Dios nga napadayag, pinaagi sa medyo giduhaduhaan, medyo nababagan nga programa sa Dios.

⁵⁶ Ingon niana sab nagsugod ang sala kaniadto sa tanaman sa Eden. Sa ingon niana nga paagi nagsugod ang kamatayon tungod sa sala, sa diha nga ang usa ka Pulong sa Dios gisayup pagsabot o giduhaduhaan. Dili mo puedeng duhaduhaan o i-sayup pagkahimutang ang usa ka Pulong sa Dios, tungod kana’y MAO KINI ANG GINAINGON SA GINOO, kay ang matag Pulong Niini mao na gayud.

⁵⁷ Ug ania si Sarah, kang kinsa gipahinungod ang maong saad (si Sarah ingon nga usa ka babaye, nga mao’y tipo sa iglesia), nagduhaduha sa orihinal nga programa sa gisaad nga

Pulong sa Dios, ug miingon, “Ikaw, Abraham, nga akong bana, minyoi kining maanyag nga babayeng-ulipon, ug pakigpuyo uban kaniya, ug mamahimo kang bana kaniya. Ug igahatag sa Dios ang maong binhi nga saad pinaagi kaniya, ug kuhaon ko ang bata.” Kita n’yo, gilaktawan lang ang usa ka diyutay’ng tipik niini, og nausab na ang kinatibuk-ang programa.

Busa, kinahanglan natong toohan ang matag Pulong sa Dios ingon nga MAO KINI ANG GINAINGON SA GINOO. Ang matag Pulong sa Dios tinuod gayud.

⁵⁸ Dinhi nagsugod kaniadto ang binhi diha sa usa ka saad, nga medyo giduhaduhaan. Si Isaac ingon nga mao ang binhi sa gawasnon ug gisaraan nga babaye, natawo kaniya, sumala sa gisaysay ni Pablo dinhi sa Mga Taga-Galacia, natawo kaniya ang natural, nga gikasaad nga binhi. Ug padayon niyang gisulti dinhi nga ang—ang mga anak sa babayeng-ulipon dili mahimong manununod uban sa mga anak sa babayeng may kagawasan, tungod kay sila gikan man sa duha ka managlahi nga mga matang.

⁵⁹ Ug, tinuod kana, ang dili-magtotoo dili mahimong manununod uban sa magtotoo. Dili, gayud. Mao kana ang problema sa karon. Dili mo mapatoo ang usa ka denominasyonhong manok uban sa usa ka agila. Dili mo gayud mahimo kana. Dinha na nagakaproblema. Kinahanglan n’yong toohan ang matag Pulong sa Dios. Kamo gayu’y... Dili kamo magkauban nga manununod. Dili ka—ka usab puedeng magpamiyembro niini; dili mo gayud kana mamahimo. Kinahanglan nga usa ka ka agila o kaha usa ka manok.

⁶⁰ Dili kini mahimong manununod uban si Ismael, nga binhi sa babayeng-ulipon, sa . . . tungod sa pagduhaduha. Giduhaduhaan ni Sarah ang Pulong sa Dios, nga mahimo bang tumanon sa Dios Kadto. Matikdi si Abraham! Matikdi n’yo kung unsay akong ginahimo nga mamahimong basihanang para sa Dominggo sa buntag. Wala nagduhaduha niadto si Abraham. Si Sarah ang nagduhaduha niadto; siya mao ang nagduhaduha. Dili man si Adan ang nagduhaduha; si Eva ang nagduhaduha. Busa, kung ingon-ana, masayran nato ang dugang pa mahitungod niana sa diha nga ato nang hisgotan kana sa Dominggo sa buntag.

⁶¹ Ang espirituwal usab dili man mahimong . . . ang natural dili mahimong manununod uban sa espirituwal. Sama ra nga ang mga anak ni Ismael dili mahimong manununod uban sa—uban sa mga anak ni Isaac, ug maingon man usab nga ang karnal dili mahimong manununod uban sa espirituwal.

⁶² Iglesiang natural; Iglesiang espirituwal. Adunay usa ka iglesiang natural nga natipo niining mga babaye dinhi; ug adunay usa ka Iglesiang espirituwal, usab. Busa, ang natural nga iglesia ug ang espirituwal nga Iglesia dili mahimong magkauban nga manununod. Sila’y duha ka nagkalainlain, og managlahi nga

mga panahon; duha ka nagkalainlain, og managlahi nga mga tawo; ilalum sa duha ka nagkalainlain, og managlahi nga mga pakigsaad.

⁶³ Mao kana kon nganong lahi ang Pagsakgaw, ug mahimong para lamang Kini sa harianong Binhi ni Abraham. Dili Kini mahimong moabot sa natural, karnal nga binhi sa iglesia. Kini’y para gayud sa harianong Binhi sa Pulong sa Dios, pinaagi ni Abraham, ang harianong Binhi. Mao kana kon nganong kinahanglan nga mauna ang Pagsakgaw.

Tungod, hinumdumi n’yo, “Kita nga mga buhi ug nanghibilin dili magapugong, magauna kanila nga nangatulog. Kay ang trumpeta sa Dios pagapatingogon, ang mga nangamatay diha kang Cristo mangabanhaw pag-uná. Kita nga mga buhi ug nanghibilin pagalalinon uban kanila, sa tingub, ug sugaton ang Ginoo diha sa kawanangan.” Matikdi n’yo, ug usab nahisulat kini, “Ug ang tanang uban pa nga mga nangamatay dili mabuhi, hangtud nga matapos una ang usa ka libo ka tuig.”

⁶⁴ Busa, dinha pa lang, dili gyud sila mamahimong magkauban nga manununod. Dili sila mahiuban sa Pagsakgaw nga magkauban. Aduna gayu’y usa ka iglesiang natural, ug Iglesiang espirituwal; usa ka iglesiang karnal, usa ka Iglesiang espirituwal. Kung ingon-ana, kita n’yo, dinhi wala na’y. . .

⁶⁵ Wala na’y Paghukom para sa harianon, espirituwal, og predestinadong Binhi ni Abraham, tungod sila’y gitagana-nangdaan ngadto sa Kinabuhing Walay Katapusan. Gidawat man nila ang gitagana nga Halad sa Dios; ug kana nga Halad, mao si Cristo, ang Pulong.

“Ug busa karon wala na’y pagkahinukman sa silot.” San Juan 5:24, kung kinahanglan ninyo ang maong Kasulatan. “Busa karon wala na’y pagkahinukman sa silot niadtong mga anaa na kang Cristo Jesus,” Mga Taga-Roma 8:1, “nga wala nagakinabuhi uyon sa unod, kondili uyon sa Espiritu,” sa mga Taga-Roma. 5:24, “Siya nga *nagapatalinghug* sa Akong Pulong,” ang pulong nga anaa dinha nagakahulogan og, “nakasabot.” Ang si kinsa man nga palahubog, ang si kinsa pa man, makapatalinghug man Niini ug molakaw na. “Apan siya nga nagapatalinghug sa Akong Pulong, ang nakasabot sa Akong Pulong, ug nagatoo Kaniya nga nagsugo Kanako, adunay Kinabuhing walay katapusan, ug dili pagahukman sa Silot; kondili miagi na gikan sa kamatayon ngadto sa Kinabuhi.” Oo, sir.

Kaniya nga gipadayag kining dakung misteryo sa Dios, nakasabot, kung unsa nga ang Dios diha kang Cristo nagapasiguli sa kalibutan ngadto sa Iyang Kaugalingon, kung unsa nga Siya ug ang Amahan Usa ra, kung unsa nga ang katumanan sa dagkung mga misteryo sa Dios nga ginadala ug ginapresentar ang Iyang Kaugalingon, nga napadayag sa kapanahonan sa mga

tawo, ug sa kaliwatan sa mga tawo, ug sa taliwala sa mga tawo; aron ipadayag ang Iyang Pulong sa maong panahon, diha sa pagsubang sa adlaw sa sidlakan, ug buhaton usab ang mao rang butang sa diha nga pasalop na ang adlaw sa kasadpan, aron ipadayag ang Iyang Kaugalingon sa usa ka Pangasaw-onong Iglesia, ang Pulong nga napadayag. Kita n'yo? Kini'y mahitabo, usab. "Siya nga nakasabot," kana'y, "ang nahibalo, nga gipadayag kana ngadto kaniya, Sa nagsugo Kanako, adunay Kinabuhing walay katapusan, ug dili pagahukman sa Silot; kondili miagi na gikan sa kamatayon ngadto sa Kinabuhi."

⁶⁶ Ang natural nga binhi usa lamang ka tigdala sa espirituwal, nga Binhi. Sama sa lindog, uhay, ug tipaka. Nahisgotan na nato kana kaniadto, sa usa pa ka Mensahe, apan gusto kong sublion kini og diyutay, dinhi, o balikan kini pag-usab sa makadiyut lang.

⁶⁷ Karon adunay tulo ka hugna ang binhi, nga ginapakita kanato ang tinuod nga hulagway, sa tulo ka hugna sa natural nga binhi sa yuta. Sama sa usa ka binhi nga gitanum, motungha diha ang lindog, mogitib gikan niana ang gamay'ng dahon; dayon ang uhay, dayon anaa dinha ang pollen; ug dayon ang tipaka; ug pagkahuman ang binhi na usab.

⁶⁸ Matikdi n'yo ang mga hugna niining hingpit nga sambingay dinhi, ug kung unsa nga nagahulagway kini sa ingon ka eksakto sa maong tipo, tungod ang Dios man ang Magbubuhay sa tanang kinaiyahan. Busa dili mahimong mapakyas ang kinaiyahan maingon man usab nga dili nagakapakyas ang Dios, tungod kay Siya man Mao Ang naghan-ay sa maong butang sa nahimutangan niini para—para matan-aw nato ug mahibaloan kana.

⁶⁹ Matikdi n'yo si Hagar, ang lindog, nga mao ang pinaka sinugdanan sa Binhi nga mitubo. Bueno, wala kadto'y unsa man nga pagkapareho sa maong Binhi. Kadto mao ang lindog, tungod usa man siya ka babayeng-ulipon, og wala gayud sa saad; walay unsa man nga kahilambigitan sa Pulong, kondili usa lamang ka tigdala sa Binhi.

⁷⁰ Matikdi pud si Sarah, ang uhay nga adunay pollen, mitungha gikan kaniya kanang nasud sa mga Judio. Nga, gikan kang Sarah, natawo si Isaac; gikan kang Isaac, natawo si Jacob; kang Jacob natawo ang mga patriarca; ug pinaagi sa mga patriarca, mitungha ang usa ka nasud.

⁷¹ Si Maria, nga may pagtoo nga iya sa ulay, ang naghimugso sa tinuod, espirituwal nga Binhi nga Pulong nga nahimong unod. Kita n'yo?

Ang tulo ka babaye, ang tulo ka babaye nga nagdala niining maong Binhi. Sa tinuod lang ang usa niini usa ka pagpanapaw, tungod sa pagpangasawa og daghan; ang ikaduha mao ang usa ka babayeng may kagawasan; ug ang ikatulo wala gayu'y

pagpakighilawas man lang, kondili tungod sa pagtoo gitoohan niya ang Pulong sa Dios. Si Hagar, si Sarah, si Sarah ug si Hagar parehong, pinaagi sa pagpakighilawas; apan si Maria ulay, tungod sa gahum sa gikasaad nga Pulong sa Dios. Husto kana.

⁷² Ang lindog, si Hagar (ikaduhang asawa), nga nagduhaduha sa saad, apan matikdi kung unsay gipanganak niana. Kaniadtong si Hagar, ang ikaduhang asawa ni Abraham, nga usa ra gyud ka gikapuyo-puyo nga asawa, apan gipanganak niya ang usa ka lalaki, pero (unsa man kini nga matang sa lalaki?) miingon ang Biblia nga siya’y “usa ka mabangis nga tawo.” Nagkinabuhi siya kaniadto pinaagi sa iyang pana, ug walay tawo nga makabuntog kaniya. Dili siya mapaaghup, dili-makabig, og dili-mabag-o. Dili gyud siya mapatuman. Siya’y usa ka salbahis nga tawo, tungod kay siya iya man sa kasukwahian batok sa Pulong sa Dios.

Ug ang unsa man nga sukwahi; ang si kinsa man nga magwawali, ang si kinsa man nga miyembro, ang unsa man nga iglesia, nga sukwahi sa Pulong sa Dios; maghimugso gayud og usa ka mabangis, mananapaw nga pundok nga iya sa kalibutanong Hollywood, ug dili kini makapabilin sa walay-sambog nga Pulong, tungod kay dili man kini kalakip sa saad. Dili.

⁷³ Si Sarah, ang tinuod nga asawa sa gikasaan, ingon nga mao ang uhay, nanganak og usa ka maaghop nga lalaki. Kini nga anak usab, nagpabunga og usa ka gisaad nga nasud nga nag-alagad sa Dios. [Blangko nga bahin sa teyp—Ed.]

Apan, si Maria, nga dili pinaagi sa pagpakighilawas, kondili mitoo ra sa gisaad nga Pulong; ingon nga siya’y usa ka ulay, walay si kinsa mang lalaki ang nakahilabot kaniya. Ug nakigtambo kaniya ang Manulonda sa Ginoo, miingon, “Maghimaya ka, Maria, bulahan ikaw sa taliwala sa mga kababayan-an, kay ang Dios uban kanimo.”

⁷⁴ Ug miingon siya, “Sa unsa ba nga paagi mahitabo kining mga butanga?” Siya . . . Ang ingon niya.

⁷⁵ Miingon ang Manulonda, “Ang Espiritu Santo magakunsad kanimo.”

⁷⁶ Wala pa gayud nahitabo sukad-sukad ang ingon niadto sa tanang mga kapanahonan, apan gitoohan ni Maria ang Dios. Ug ingon siya, “Ania karon ang ulipon sa Ginoo.” Gitoohan niya ang Pulong.

Unsaon man niya sa pagpakabaton niadto? Nasayod siya nga nakabaton si Hagar og bata pinaagi og pangibog sa pakighilawas, uban ni Abraham; ug nga si Sarah nakabaton pud og bata pinaagi og pangibog sa pakighilawas, uban ni Abraham, mga anak sa saad; sa babayeng-ulipon ug sa babayeng may kagawasan. Apan dinhi gihangyo siya nga motoo. Usa kadto ka gasa sa pagtoo nga atua kang Abraham, nga mitoo sa mga

imposible, “Basta giingon sa Dios nga ingon niana, nan husto gyud kana.”

⁷⁷ Gitoohan sa maong babaye ang Dios, og wala gayud nagduhaduha. Ingon siya, “Ania karon ang ulipon sa Ginoo. Bisan unsa pa ka daghan ang kritisismo nga kinahanglan kong antuson gikan sa kalibutan, matuman unta kini kanako sumala sa Imong Pulong.” Dinha migawas ang tinuod nga Binhi.

⁷⁸ Dili kadto mahimo ni Sarah, tungod kay mahimong pinaagi na kadto og pagpakighilawas. Husto kana. Ug dili gayud mahimo ni Sarah, tungod kay mahimong pinaagi na kadto og pagpakighilawas.

Dili usab mahimo sa iglesia, ilalum sa sektarianismo! Gikinahanglan ang putli nga pagtoo diha sa Pulong sa Dios aron matuman ang usa ka saad, aron makapahimugso og mga anak. Ang sektarianismo dili gayud makapahimugso og Iglesia nga natawo na pag-usab. Dili niini mahimo kana. Makapahimugso kini og usa ka pangpuli lang. Makapahimugso kini og usa, usa ka butang nga magsundog-sundog ra Niini, usa ka butang nga gapaninguhang mahimong susama Niini.

Apan ang usa ka tinuod, nga natawo na pag-usab nga Iglesia sa Dios nagatoo gayud sa Pulong sa Dios walay sapayan sa unsa mang butang, bisan unsa pa kana, tungod kay putli man kini. Nagakahitabo kining mga butanga pinaagi sa saad sa Dios.

⁷⁹ Si Maria, ang maong tinuod, miingon, pinaagi og . . . -walay pagpakighilawas, miingon, “Matuman unta kini kanako sumala sa Imong Pulong. Ania karon ang Imong ulipon!”

Ug nanganak siya. Unsa ma’y gipanganak niya? Dili usa ka mabangis nga lalaki; dili pud usa ka nasud. Kondili gipanganak niya ang Pulong, ang Dios Mismo nga napadayag sa unod; amen, ang tinuod nga Binhi sa Dios nga nagpahitabo sa matag saad nga gihimo sa Dios diha sa Biblia; kon wala Siya, walay tawo nga mahimong mabuhi kon wala Siya.

⁸⁰ Si Maria ang tinuod nga binhi, labaw pa siya sa u . . . siya mao ang tipaka nga naghimugso sa Lugas. Bueno, ang nahaunang duha mga tigdala lamang sa Kinabuhi, ingon nga mga natural nga binhi. Si Maria . . . Karon, hinumdumi, ingon ko nga ang nahaunang duha . . . Karon, si Maria, ayaw n’yo siya himoa nga Dios, sama sa ginapaningkamotang buhaton sa mga tawo kaniya. Dili man siya dios. Dili, sir. Siya’y tigdala lamang sa Binhi, sama sa uban pa kanila; apan, sama sa pagtoo sa Pulong, naghatud og mas tinuod nga hulagway.

⁸¹ Susama ra pag mogulang na ang mais, o ang trigo. Motungha kana, nga usa ka lindog; dayon motungha diha niana, ang pollen; dayon motungha, ang tipaka. Apan madahum n’yo, kanang tipaka, kung dili n’yo mamatikdan, mora og eksaktong kapareho gayud sa tinuod nga trigo. Apan pag ablihon kana, ang trigo mismo anaa ra diay sa sulod. Usa ra kini ka tigdala, usab.

⁸² Busa, nakita n'yo, si Maria, dili pinaagi sa pagpakighilawas, kondili tungod sa pagtoo; usa ka butang nga mora'g eksaktong sama gyud Niadto. Dili si Maria ang Kadtong Binhi. Tigdala lamang si Maria sa maong Binhi.

Si Jesus mao ang tinuod, nga pagtoong Binhi, tungod kay pinaagi man sa pagtoo nga ang Pulong sa Dios gihatag ngadto kang Abraham. Ug ang pagtoo lamang ang makapahitabo sa gisulti sa Dios nga Iyang pagabuhaton; pagtoo sa Iyang Pulong.

⁸³ Matikdi kung unsa ka mas kapareho gayud sa tinuod nga Butang, si Maria, apan sama ra gihapon kini sa tipaka. Ginaputos sa tipaka ang binhi sa sulod niini ug ginaampingan kini, ug gina-amuma kini hangtud nga mahimo na niini nga mag-inusara, og gulang na. Mao man usab kining ikatulong kapanahonan sa iglesia (ang Pentecostal) nga migulang na, gihawiran niini ang Lugas hangtud sa panahon nga maabli na ang tipaka. Si Maria, ingon nga inahan ni Cristo, usa lamang siya ka incubator.

Wala Siya'y dugo nga iya ni Maria; wala Siya'y dugo nga iya sa Judio; wala pud Siya'y dugo nga iya sa Gentil. Siya mao ang Dugo sa Dios. Gilalang mismo sa Dios kini nga Dugo. Dili kini mahimo nga pinaagi og pakighilawas. Dili Siya Judio ni Gentil man.

⁸⁴ Ngani ang bata wala'y ni usa ka tulo sa dugo sa inahan. Nagagikan ang dugo sa amahan. Nasayod kita nga ang hemoglobin anaa sa lalaki.

Sama sa manok, makapangitlog man kana, makapangitlog ang usa ka himongaan; apan kung wala niya gikaipon ang lalaking manok, ang sunoy, dili gayud kana mapiso. Dili kana mahimong mapiso, bisan pa kini og eksaktong mora gyud og sama sa tinuod nga himsog nga itlog. Bisan pa ang kinaiyahan niini pareho gyud kon tan-awon, apan wala diay kana og kinabuhi.

⁸⁵ Ingon niana usab sa mga tawo nga ginapamahayag si Cristo. Daghan kanila ang mora'g mga Cristohanon kon tan-awon, nga gapaninguhang manglihok nga sama sa mga Cristohanon; apan kinahanglan gayud nga anaa si Cristo sa kinasuloran mo, nga mao ang Pulong nga napadayag, o dili ka gayud mamahimong hamtong ingon nga usa ka tinuod nga Cristohanon nga nagatoo-sa-Biblia. Kanunay ra kang usa ka tawong pang-denominasyon. Dili mahimong mabuhi, tungod wala ma'y Kinabuhi sa sulod, aron ikinabuhi.

Dili mapiso ang itlog, mabugok ra kana diha sa pugaran, kung wala gikauban sa himongaan ang—ang lalaking manok.

⁸⁶ Sama lang sa mga miyembro sa usa ka iglesia. Mahimo mo silang bebi-behion ug tawgon sila, himoon sila nga mga diyakono ug kung unsa pa, apan sila'y...aduna ka lang og

pugaran nga puno og mga bugok nga itlog gawas kon nakaipon nila ang ilang Kapikas. Husto kana.

⁸⁷ Ang tigdala, ang tipaka, ang nag-amuma Niana. Husto kana. Dayon Kana, ang, Binhi Mismo, kinahanglan nang mobiya sa tipaka, o kinahanglan nang biyaan sa tipaka ang Binhi, aron nga mabulad ang Binhi sa Presensiya sa Anak, aron mahinog Kana. Makita nato, ang tanan anaa sa usa ka pagtipo.

⁸⁸ Matikdi n'yo dinhi karon kung unsa siya ka halos pareho gyud, ang iglesia sa niining kaulahiang mga adlaw, nga nahimong pareho na gyud kon tan-awon sa Mismong Binhi. Tan-awa n'yo kung unsa nga kining denominasyon sa Pentecostal nga mitungha sa kaulahiang mga adlaw, ug hatagan nato kana og diyutay'ng katin-awan pagkataudaud, kita n'yo, kung unsa nga nahimo silang halos kapareho gayud sa Binhi kon tan-awon.

Sa diha nga mobusikad na ang tipaka gikan sa lugas sa trigo. . . o ang dahon sa trigo, human nga mahulog ang pollen dinha sa ikaduhang hugna, ug mitungha na ang ikatulong hugna nga mao ang—ang—ang tipaka. Ug kung unsa nga kanang. . . Kung dili ka usa ka maayo nga tigpaniid, nan dili mo gayud maila nga dili diay tinuod nga lugas sa trigo ang anaa dinha. Pag motungha na ang unang gamay nga trigo, nga mora kini og usa ka lugas, apan lingkod gani ug ablihi kana ug mahibaloan mo nga wala gayu'y lugas dinha. Kana'y tipaka lamang, nga tigdala sa lugas. Bueno, dinha niana nagatungha ang lugas. Apan hinumdumi, nga wala na'y unsa pa man pagkahuman na nianang tipaka.

Hinumdumi n'yo, nga wala na'y gikasaad nga Binhi nga pinaagi sa usa ka babaye, sa bisan asa man, human ni Maria. Ug wala na usab og gikasaad pa nga mga denominasyon human sa Pentecostal. Ang Pagsakgaw na ug ang pagtungha sa Pangasaw-onon ang maanaa na dinha, ang Binhi, ang Pulong nga nadayag pag-usab.

⁸⁹ Matikdi, tan-awa n'yo kung unsa kini ka halos pareho na kon tan-awon. Ang ingon ni Mateo, San Mateo 24:24, miingon, nga, “Ang maong duha ka espiritu sa kaulahiang mga adlaw,” ang iglesiang espiritu sa mga tawo sa iglesia, ug ang Espiritu sa Pangasaw-onon sa mga tawong Pangasaw-onon, “halos magkapareho na gayud hangtud nga malimbongan niini ang mismong mga Pinili kon mahimo pa.” Ingon niana ka halos magkapareho gayud.

⁹⁰ Tan-awa n'yo kung giunsa niana pag-agi sa lindog. Karon matikdi, aduna kita'y itipo dinhi.

Si Luther, diha sa kapanahonan sa iglesia, sa dihang nagatubo na ang Pangasaw-onon nga Binhi, pareho ra diha sa Espiritu. Usa lang ka gamay nga lugas sa Binhi, ang gibarugan ni Luther kaniadto, kadto mao ang pagpamatarung pinaagi sa pagtoo. Siya mao ang pinaka-tipo ni Hagar, ang lindog.

Matikdi, si Wesley ang tipo ni Sarah, ang Filadelfia, ang kapanahonan sa gugma nga nagpagawas og uhay. Dinha sa kapanahonan ni Wesley, nga adunay mas daghan nga mga misyonaryo kaysa sa uban nga kapanahonan nga nagkaaduna kita, ang halangdong kapanahonan sa pagpang-misyon sa panahon ni John Wesley.

⁹¹ Apan girepresentar sa Pentecostal si Maria. Si Maria, ang kaulahiing hugna Niini, kaniadto, dili siya ang Binhi. Bisan pa niana, anaa kaniya ang Kinabuhi sa Binhi, apan wala pa Kadto nahimong gulang. Gibati ko ang pagkarelihiyoso gayud. Adunay. . . Anaa kang Maria ang binhi, pero wala pa Kadto nahimong gulang. Atua na Kini didto, apan wala pa Kini nahimong gulang.

Mao man usab sa kapanahonan sa Pentecostal nga atong gikinabuhian! Kinahanglan aduna una og mogawas nga usa—usa ka Pulong sa Dios nga anaa sa sulod, dili-denominasyonhon, og gawas sa mga ginsakupan sa denominasyon.

⁹² Napaingon si Luther sa pagka-tipaka diha sa iyang unang pulong, “Mabuhi ang matarung pinaagi sa pagtoo.” Aduna ang ikaduhang pulong kang Wesley, “pagpabalaan,” nga ikaduhang di-malalis nga buhat sa grasya. Anaa sa Pentecostal ang ikatulong pulong, “ang pagpasig-uli sa mga gasa.” Apan kinahanglan nga mogawas ang tibuok Binhi! Kita n’yo kung unsa nga nanghimo sila og denominasyon diha sa usa ka pulong, ug sa usa pa ka pulong, ug sa usa na usab ka pulong?

Apan adunay usa ka Butang nga dili gayud mamahimong denominasyon; kana mao ang kinatibuk-an sa maong Kinabuhi nga anaa sa sulod, og kinahanglan nga mahimugso pag-usab ang Kaugalingon Niini diha sa usa ka Pangasaw-onon. Wala na’y uban pang mga kapanahonan sa iglesia human niini. Ania na kita sa katapusan, mga igsoong lalaki ug babaye. Ania na kita. Miabot na kita. Salamat sa Dios! Amen. Karon, makita nato kining mga butanga nga ingon na gayud ka tinuod.

⁹³ Mamatikdan pud nato, kung ingon-ana, nga siya ingon nga mao ang uhay, o. . . si Wesley ingon nga mao ang uhay; ang Pentecostal usab ingon nga tipaka, nga mao ang sunod nga hugna sa pagtungha sa Lugas. Apan, igsoong lalaki, igsoong babaye, ang lindog dili man mao ang Lugas, ni ang uhay dili pud mao ang Lugas, ni ang tipaka usab dili man mao ang Lugas; bisan pa, sa matag higayon nga nagakagulang kini, mas nagakapareho gayud kini sa Lugas.

⁹⁴ Ang lindog dili man kapareho sa lugas. Dayon human niana unsa man ang mogawas? Ang uhay, ang gamay’ng piyoos; mas kapareho kini sa lugas kon tan-awon kaysa sa—kaysa sa dahon. Unsa man ang sunod nga mogawas? Ang tipaka; ginahawiran niini ang lugas, og ginaampingan niini ang lugas.

⁹⁵ Karon tan-awa n'yo dinhi ang saad nga gihimo sa Dios para kang Abraham, nga “ang imong Binhi,” sa espirituhanon nga pagkasulti. Ang si kinsa man kanato nasayod na niana. Si Cristo ang gihisgotan sa Dios, dili si Isaac; pinaagi sa pagtoong Binhi ni Abraham.

⁹⁶ Matikdi, ang una nga pinaagi sa babayeng-ulipon, wala gyud og unsa man nga pagkapareho sa saad. Dili man kinahanglan bakwion sa Dios ang Iyang Pulong tungod lang sa kang kinsa man. Gisulti na sa Dios sa kung unsang paagi kana mahitabo, ug sa ingon niana nga paagi gayud kana mahitabo. Apan, si Sarah, ingon nga representante sa iglesia, nga tipo sa iglesia, kadto (iyang) nahibaloan didto, nga miingon siya, “Bueno, nagatoo ko nga kini’y medyo makahibulongan man gud kaayo. Dili gyud ako basta-basta makatoo niana, busa umadto ka ug kuhaa si Hagar ug kuhaa siya ingon nga imong asawa.” Kita n’yo, na, ang maong lindog dili gyud kapareho sa saad, dili gayud.

Apan pagpanganak na mismo ni Sarah, bueno, mora’g mao na gyud kadto. Daw sa mas mao na gyud kadto ang saad, apan dili gihapon kadto mao ang tinuod nga saad. Tungod kay, ang Israel, diha kang Isaac, napakyas man ug gisalikway ang tinuod nga Binhi sa diha nga miabot Kadto. Alleluyah! (Ayaw mo og kanerbiyos; ayaw pagdagan. Dili man kana makapadaut kaninyo.) Gisalikway ang maong Binhi, gilansang nila Siya, ug gibitay Siya sa krus!

⁹⁷ Sama lang sa gisulti ni Pablo dinhi, “Dili ba ang—ang binhi nga iya sa—sa babayeng may kagawasan . . . o sa babayeng-ulipon gilutos man ang Binhi sa babayeng may kagawasan?”

Ug mao man usab ang binhi nga iya sa denominasyon nga ginalutos ang tinuod nga Lugas. Ingon na niana kini sa una pa. Dili sila magkauban nga manununod. Dili gyud sila magkauban. Bug-os silang duha ka managlahi nga saad, duha ka managlahi nga panahon, duha ka managlahi nga mga tawo, gayud. Ang usa mao ang Pangasaw-onon, ug ang laing usa mao ang iglesia. Walay pagkapareho, man lang, diha kanila.

⁹⁸ Apan dili gihapon sila mao ang Binhi nga gikasaad nga moabot. Dili si Sarah, dili usab . . . Ug dili usab si Hagar, dili usab si Sarah, o—o ni si Maria, ang Binhi.

Dili si Maria ang Binhi. Siya lang ang tigdala sa Binhi, apan iyang giampingan, og gihimugso gikan sa iyang tagoangkan. Sama lang sa tipaka, nga mitungha gikan sa tagoangkan niini ang tinuod nga Binhi, apan ang tipaka dili man mao ang Binhi. Kini lang . . . Halos magkapareho lang sa Binhi. Nakaputos sulod niini ang Binhi.

Sa kinasuloran sa lindog, napatlaag ang kinabuhi sulod sa tibuok lindog. Ug pag-abot niini sa pollen, mas nagkatapok kini. Apan pag-abot niini sa tipaka, atua na kini mismo nga sama sa binhi, ug nagakaporma kini nga halos pareho na sa binhi.

Gisultihan na kita ni Jesus kung unsay mamahitabo sa kaulahiang adlaw, “Halos magkapareho na gayud nga malimbongan niini ang mismong mga Pinili kon mahimo pa,” apan sa gihapon mogawas ang Binhi gikan dinha. Ug ang tipaka, biyaan na sa Kinabuhi ang tipaka. Ug ang tipaka ingon nga usa ra ka tigdala, ug eksaktong ingon niana gayud ang atong mga denominasyon, usa ra pud ka tigdala; si Luther, si Wesley, ang mga Pentecostal. Ug karon panahon na para sa Binhi nga mogawas. Matikdi, matikdi, lang . . .

⁹⁹ Dili siya ang Binhi. Dili si Maria. Usa lamang ka tipaka, uhay, ug lindog, mga tigdala sa bahin sa Pulong, dili ang tibuok Pulong! Aduna si Luther ang pagpamatarung; aduna si Wesley ug pagpabalaan; ug mga Pentecostal aduna pud og pagpasig-uli sa mga gasa. Apan pag-abot na sa Pulong . . .

Bueno, mahimo man niadto, nga, ang pagpamatarung makaluwas sa tawo. Nagatoo ba mo niana? Oo, usa man kadto ka tigdala sa Pulong, sama ra nga nagatoo ako nga ang lindog kabahin sa trigo. Oo, kabahin kana, apan tigdala ra kana. Dili kana mao ang Kinabuhi.

Dayon miabot ang pagpabalaan. Pila man ang nagatoo sa pagpabalaan? Kung nagatoo kamo sa Biblia, nan motoo gyud kamo. Oo. Apan dili pa gihapon kana; halos magkapareho na; pero duha pa lang ka pulong kana.

Apan pagkahuman miabot ang Pentecostes, ang pagpasig-uli sa mga gasa. Ang pagsulti og laing mga pinulongan, ginatawag nila kana nga unang kapanghimatuoran sa Espiritu Santo. Ang pagsulti og laing mga pinulongan, kaniadto, ginatawag nila kana nga unang kapanghimatuoran, nga nagpatungha (sa unsa?) sa tipaka, ug naghimo sila og denominasyon.

Apan sa diha nga miingon na, “Ako ug ang Akong Amahan Usa ra,” ug kining uban pang mga butang, nan mipahilayo na Niini ang tipaka. Apan ang tinuod, og matuod nga Iglesiang Pangasaw-onon igapamunga gayud ang tibuok Pulong sa Dios, sa kahupnganan Niini ug sa gahum Niini, kay Siya man mao sa gihapon kagahapon, karon, ug hangtud sa kahangturan.

Matikdi, nga sa tagoangkan ni Maria atua kaniadto ang Binhi.

¹⁰⁰ Apan sa diha nga gihimugso na ang Binhi, miingon Kini, “Mianhi Ako aron buhaton ang kabubut-on Niya nga nagsugo Kanako. Ako ug ang Akong Amahan Usa ra. Kung wala Ko ginabuhat ang Iyang mga buhat, ayaw Ko ninyo toohi.” Mao kadto ang Binhi. “Kinsa ba kaninyo ang makapasangil Kanako og dili-pagtoo? Kung unsa ang gisaad sa Biblia nga Akong pagabuhaton, gibuhat Ko man. Gipamatud-an kana sa Dios pinaagi Kanako,” miingon Siya, “Kinsa man ang makasulti Kanako karon?” Kita n’yo?

Apan, ang—ang Binhi nga anaa kang Maria, ang tipaka, kadto'y halos pareho na gyud Niana, apan dili gihapon. Anaa pa Kadto sa tagoangkan.

¹⁰¹ Matikdi n'yo, ug bisan sa kapanahonan sa Pentecostal. Bisan sa kapanahonang Lutheran, sa kapanahonang Wesleyan, mao ra gihapon sa niining kapanahonan sa Pentecostal.

Karon matikdi. Apan sa pag-abli na sa Pito ka Selyo, Pinadayag 10, ang bug-os nga Pulong mahimugso pag-usab ngadto sa kapadayagan, ug panghimatud-an sa Espiritu sa Dios, diha sa bug-os nga gahum sama sa kung unsa Kini kaniadtong ania pa Siya sa yuta; mahipadayag sa mao gihapong paagi, nga ginabuhat ang mao gihapong mga butang nga gibuhat Niini kaniadtong ania Kini sa yuta. Amen! Mga Hebreohanon 13:8, miingon, "Si Jesus Cristo mao sa gihapon kagahapon, karon, ug hangtud sa kahangturan."

Sa San Lucas 17:30, miingon si Jesus, "Sa kaulahiing mga adlaw, maingon sa nahitabo kaniadto sa mga adlaw sa Sodoma, sa diha nga ginapadayag na sa Anak sa tawo ang Iyang Kaugalingon pag-usab, mahitabo ang mao gihapong butang."

¹⁰² Ang kalibutan anaa na sa Sodomanhon nga kahimtang. Ug ang iglesia anaa na sa Sodoma, miapil na niini, sama ni Lot ug sa iyang asawa kaniadto.

Ug ginasulti ko nga aduna gyu'y usa ka Piniling Iglesia sa kon asa man niining kalibutan, nga nagapahilayo na ug nagapahimulag gikan nianang mga butang, ug ang kapadayagan sa Dios mao ang nag-awhag sa pagtagad Niini. Ania na kita sa kaulahiing mga adlaw.

¹⁰³ Gihatag na sa tipaka ang Gahum niini ngadto sa Binhi. Mibiya na kini; maayo kini nga tipaka, apan natapos na man ang panahon niini. Kita n'yo, kini mao na ang Pulong Pangasawonon sa Pamanhonon nga Pulong!

¹⁰⁴ Ang natural nga binhi ni Abraham, ni Isaac, ug ni Jacob, ug . . . O, ang natural nga binhi, diay, ni Ismael, ang natural nga binhi ni Isaac, ug uban pa, kinahanglan nga mailubong sa yuta, aron nga—nga mapagawas kining usa pa, mapagawas si Jesus.

Ug mao man usab kining tanang uban pa, ang mga binhi kinahanglan nga mauga . . . ang buut kong ipasabot, ang mga tipaka kinahanglan nga mauga, ug ang pollen kinahanglan nga mauga, ug ang tanan mamatay, aron nga mapagawas sa Binhi ang Kaugalingon Niini. Ingon na niana kini sa matag kapanahonan.

¹⁰⁵ Ang mga denominasyon mga tigdala ra sa mga bahin Niini, sa mga bahin sa maong Pulong, tungod kay gililong man Kini gikan sa maalamon nga mga repormador, o ang . . . gikaselyohan kanila, hangtud nga motungha na ang kapanahonan sa mga Agila. Ingon niana ang gisulti sa Biblia. Oo, sir. Tungod kay,

gikasaaran man kita niana sa Malaquias 4. Eksakto gayud, gikasaaran kita.

“Gililong Niya Kini sa mga mata sa mga makinaadmanon ug mga masinabuton.”

¹⁰⁶ Maingon sa bag-chay lang natong gihisgotan ang Basahon sa Pinadayag, hingsayran nato nga ang tanan, ang tulo niadtong mga mensahero sa mga buhing-binuhat nga nanungha; ang matag usa mitakdo gayud kang Luther, ang matag usa mipuwesto eksakto gayud ngadto sa usa pa, ang laking-baka ug ang maong uban pa nga mga mananap sa Biblia; miagi kini sa pagpamatarung, pagpabalaan, og bisan ngadto sa mga Pentecostal. Apan ang ikaupat mao ang agila, husto kana, ug pinaagi niana nga kapanahonan gipatungha Kini sa Dios. Busa kinahanglan niini nga moagi niana nga kapanahonan aron mahimong husto, oo, sir, ang gikasaad nga agila nga natuman na sa—sa Malaquias 4.

¹⁰⁷ Si Jesus dili man iya ni Maria, kondili miabot pinaagi ni Maria, sama sa Kinabuhi nga mitungha pinaagi sa tipaka.

¹⁰⁸ Karon, daghan kaninyo nga buutan nga mga Katolikong igsoong lalaki, o mga igsoong babaye, ang ania dinhi karong gabhiona, nga tingali nagahunahuna nga si Maria mao’y “inahan sa Dios,” sama sa ginaingon ninyo nga siya mao ang inahan. Giunsa man niya pagkahimo nga inahan sa Dios, nga ang Dios wala ma’y sinugdanan ug walay katapusan? Kita n’yo? Si kinsa kaha ang Amahan sa Dios, kung ingon-ana, kon siya man mao ang inahan? Kita n’yo?

Si Jesus ang Magbubuhat ni Maria, ug dili si Maria ang Iyang magbubuhat. Gilalang Niya, ang Iyang Kaugalingon, sulod sa tagoangkan ni Maria, og dili nga linalang ni Maria. Siya mao ang, naglalang, sa Iyang Kaugalingon. Siya’y dili gikan kang Maria, kondili si Maria ang gikan Kaniya. Husto kana. Nagatudlo kanato ang Biblia, nga, “Ang tanang mga butang nangahimo pinaagi Kaniya,” kita n’yo, “ug walay bisan unsa man nga hinimo gawas sa Iyang hinimo.” Busa giunsa man Niya...Giunsa man Niya pagpakabaton og inahan, nga Siya man mao ang Dios Mismo?

¹⁰⁹ Karon makita nato dinhi ang tinuod nga kapadayagan mahitungod sa tinuod nga tipo. Adunay tulo ka babaye nga mga tigdala sa natural nga binhi, hangtud nga migulang diha kang Jesus. Dili mamahimo nga si Ismael kadto, tungod kay nahimugso man siya, sa tinuod lang, sa mahunahuna nato sa karon, nga gawas sa kaminyoon, tungod siya’y anak man sa babayeng-ulipon. Dayon miabot ang halos kapareho Niya, kapareho ni Jesus, nga mao si Isaac; apan dili gihapon siya, tungod kay natawo man siya pinaagi sa pagpakighilawas tali ni Sarah ug ni Abraham. Apan pagkahuman nanamkon si Maria,

nga pinaagi sa ulay nga pagkahimugso, og natawo si Jesus Cristo. Husto kana. Ang Dios, ang Pulong, nga nahimong unod.

¹¹⁰ Karon matikdi. Adunay tulo ka babaye. Adunay tulo ka babaye nga gitipo dinhi, ingon nga mga iglesia. Ang mga babaye kanunay nga nagatipo sa mga iglesia. Nga nagakahulogan og, tulo ka denominasyong kapanahonan, mga tigdala, nga kinahanglan usab nga mamatay ug mauga, sama lang sa tipaka ug sa uban pa, aron magkaadunay lugar para sa Binhi. Ang Binhi dili mamahimong husto, dili mamahimong gulang, diay, hangtud nga dili pa mangauga, ang tipaka, ang lindog, ug mga dahon. Husto kana. Ginasuyop Niini ang matag tipik sa Kinabuhi, gikan kanila, pagawas; amen; og kini'y tanan-tanan, niana, og dugang pa.

¹¹¹ Dili na kana magpulos! Panahon na kini karon sa Binhi, o panahon na sa Pangasaw-onon. Patay na ang mga tipaka. Nangauga na ang mga tipaka. Panahon na sa ulay nga Pulong, nga wala gyud nahilabtan. Usa ka ulay, timan-i n'yo, panahon sa usa ka ulay nga Pulong. Kung ipahimutang mo Kini sa mga kamot sa denominasyon, nan siguradong dili na Kini mamahimong ulay; nahilabtan na Kini, sa higayon nga miabot na Kini kanimo. Apan ang Iglesia sa Dios dili gayud mahilabtan sa denominasyon. Alleluyah! Usa Kini ka natawo-sa-ulay nga Pulong sa Dios nga napadayag, si Jesus Cristo nga mao sa gihapon kagahapon, karon, ug hangtud sa kahangturan. Alleluyah! Grabe, pagkamaanindot gayud! Ginahigugma ko Kini. Ginatoohan ko Kini. Nasayod ako nga Kamatuoran Kini. Dili Kini mahilabtan. Walay denominasyong pagpanghilabot sa ulay nga Pagkahimugso sa Pangasaw-onon. Wala, sir! Siya'y—siya'y minandoan sa Dios nga mogawas sa ingon niana. “Dili kamo maghikap sa ilang mahugaw nga mga butang, og mamahimong mga buitre.”

¹¹² Nahinumduman ko lang. Sa nagabiyahe ako gikan sa Phoenix niadtong miaging adlaw, paingon sa Tucson, gikan sa panagtigum, gitawag sa Espiritu sa Dios ang akong pagtagad ngadto sa usa ka butang; samtang nagabiyahe kami sa akong asawa, nga nag-istoryahanay, ug tulog na ang mga bata sa luyo nga bahin sa sakyanan, tungod medyo nagka-hapon na man gud. Gitawag ang akong pagtagad ngadto sa usa ka banog, ug gitanaaw ko kadtong banog sa makadiyut ug gisusi siya. Siya mao ang pinaka-tipo sa iglesia karong panahona.

¹¹³ Bueno, ang banog, sumala sa nahibaloan na natong tanan, giwala na niya ang pagkaila sa orihinal nga paglalang kaniya. Eksakto gayud kana. Pareho pa siya kaniadto sa usa ka agila, nga mas duol niya nga igsoon; ang banog kaniadto. Apan karon wala na siya nagalupad sa kawanangan, aron mangita og langitnong niyang manna, kondili nahimo na siya nga huyang. Wala na siya nagalupad sa kawanangan. Nagalukso-lukso na lang siya sa yuta, nga sama sa usa ka buitre; nagatugdon na lang siya sa mga

poste sa telepono; nagalukso-lukso, nga nagapangita na lang og patay na nga mga rabbit. Wala man unta gihimo ang banog para buhaton ang ingon niana. Kondili, gihimo siya aron mahimong kapareho sa agila.

Bueno, mora lang kana og ang iglesia. Gihimo pud kini nga pareho sa agila. Angay unta nga anaa kini sa Kalangitan. Apan, imbis nga ingon niana, nahimo na kini nga huyang. Wala na kini nagalupad ngadto sa wala-masayri nga mga dapit, sa kawanangan. Wala na, sir. Nagasalig na lang kini sa modernong mga pamaagi niini, sa pagpahiangay, sa edukasyon, ug teolohiya, sa usa ka hinimo'g-tawo nga denominasyon; nagapangita na lang siya og pundok sa patay na nga mga rabbit, nga halos mga dunot na, nga gikaon na sa uban pa. Husto kana. Nagalukso-lukso na lang sa yuta karon, nakita n'yo, husto kana, ang banog. Kita n'yo, dinha mo siya maila.

Ang agila wala gayud nausab bisan gamay. Nagapabilin ra siya ingon nga usa ka agila.

¹¹⁴ Wala na siya nagalupad ngadto sa kawanangan, wala na, ang banog, aron manguha unta og lab-as niyang manna didto sa kahitas-an, kondili nagadepende na lang siya sa kung unsay iyang makaplagnan nga patay na. Ang banog dili na halos . . . ingnon ta nga dili unta siya angay'ng maanaa ra sa yuta. Apan matikdi ang usa ka banog sa karon. Subay gani didto sa kalsada, og makita mo ang mga kabli sa telepono nga puno sa nanagtugdon nga mga banog, nagabantay kung may makaplagnan ba siya og usa ka butang—usa ka butang nga patay na, usa ka dunot na nga butang. Nahimo na siya nga mora ba og wala na'y mga pako aron sa paglupad. Siya'y . . . Mahibaloan mo na lang, nga anaa na siya sa yuta, pirmi, na lang anaa sa yuta tungod kay nahimo na man siyang huyang. Wala na niya ginagamit ang iyang kusog, wala na gyud, nga gihatag sa Dios kaniya.

¹¹⁵ Ang iyang espesyal unta nga pagpaila mao ang paglupad ngadto sa kawanangan ug magadungaw dinha sa ubos, apan karon siya'y nagatugdon na lang sa ubos ug dili na gani makahangad. Nakasentro na lang ang iyang hunahuna ngadto sa patay na nga mga rabbit, nga makita niya diha sa dalan; usa kaha ka milo, opossum kaha, o unsa man nga naligsan ni kinsa man. Dili siya agila, apan mora siya og ingon niana.

Sama lang sa iglesia nga gisalig na lang ang pagkaon niini sa edukasyon ug uban pa, usa ka pagkaong walay-kinabuhi nga namatay pipila na ka tuig ang milabay, gikan pa ni Luther, ug ni Wesley, ug sa mga Pentecostal, ug mga nangagi na, ang iyang ginakaon. Nagabalik kini sa kung unsa nga kredong hinimo-sa-tawo; imbis nga molupad ngadto sa Langitnong dapit sa Pulong, kon diin, “Ang tanang butang mamahimo kanila nga nagatoo.”

¹¹⁶ Nakuha na niya ang mga gawi nga iya sa buitire. Ang mga patay nga butang para ra sa mga buitire, ang kalibutan. Ang mga edukasyon ug uban pa nga sama niana, para ra kana sa kalibutan, dili para sa Iglesia. Siya’y mahuyang na kaayo nga dili na siya . . . Dili na kini lig-on. Dili na niya mahimong mopaitaas pa ngadto sa malisud nga dapit sa Kalangitan, kon diin, “Ang tanang butang mamahimo kanila nga nagatoo.”

Moatras ra siya, ug moingon, “Bueno, si Doktor *Ingon niini-ug-ingon niana* duna ma’y giingon . . . Ang akong denominasyon dili man nagatoo Niini sa ingon-anang paagi.” Oh, kamong mga tulibagbag nga banog, nga nahadlok barugan ang mga saad sa Dios!

Ginaingon n’yo, “Bueno, milabay na ang mga adlaw sa milagro.”

¹¹⁷ Mga huyang ra kamo. Nangahadlok kamong ipangbukhad ang inyong mga pako ug maglupad paitaas. Ug mahuyang na ba mo kaayo para sa usa ka panagtigum sa pag-ampo? Miabot na ba mo sa punto nga mahadlok na kamong magpabilin og lagpas sa diyes minutos diha sa altar?

¹¹⁸ Nagalukso nga sama na lang sa usa ka buitire, nagakaon og patay’ng dubok na nga mga karne sa yuta! Oo, sir. Siya’y mahuyang na kaayo aron mopaitaas ngadto sa malisud nga mga dapit, didto. Nagalukso nga sama na lang sa buitire, ug nagakaon sa pagkaon nga iya sa mga buitire. Ingon na niana kini. Husto kana. Hangtud nga, mora na siya og buitire. Nagalihok na siya nga sama sa buitire. Dili na siya usa ka banog. Mas pareho na siya sa usa ka buitire kaysa sa usa ka banog. Ug nagalupad man unta ang usa ka banog; dili nga nagatugdon lang sa poste sa telepono ug nagahulat alang sa usa ka patay na nga rabbit, ug dayon mokanaug dinha ug molukso-lukso sa kalsada nga sama na sa buitire. Kita n’yo?

¹¹⁹ Ingon na niana gayud ang iglesia sa karon. “Unsa ma’y kapuslanan nga mopaibabaw pa ako Didto ug maglupad-lupad, kung makakuha ra man ko og mga rabbit dinhi?” Apan mga patay na kana. Dunot na kana. Kontaminado na kana. Kaniadto, maayo pa man kana; mao man usab ang doktrina nga iya sa Lutheran, ni Wesley, ug sa mga Pentecostal. Nganong nagakaon na man mo nga sama sa buitire? Aduna man og bag-ong manna nga nangahulog sa matag gabii, gikan sa kalangitan, para sa mga anak sa Israel kaniadto samtang nagapanaw sila; ang unsa man nga nahibilin kontaminado na. Ginasulti namo kaniadto, sa probinsya, “aduna na’y mga wayawaya niini.” Pagkadaghan na usab og mga wayawaya sa atong mga kasinatian sa karon, sa atong mga relihiyon, nga nagabasi ra sa kung unsay gisulti ni kinsa pa man, kung unsay gisulti ni kinsa pa man, ug, “Ang maong saad para ra man sa uban nga kapanahonan.”

¹²⁰ May usa ka lalaki ang miduol kanako dili pa lang dugay, didto sa akong balay, usa ka magwawali sa Baptist, ug miingon, “Kabalo ka,” miingon, “Ako—gusto ko lang nga tul-iron ka mahitungod sa usa ka butang.”

Ingon ko, “Sa unsa man?”

Miingon, “Ginapaninguhaan mo pang itudlo ang apostolikanhong Doktrina sa niini nga kapanahonan.” Ingon pa, “Tapos na man ang apostolikanhong kapanahonan.”

¹²¹ Ingon ko, “Kanus-a man?” Kita n’yo? “Isulti ko kanimo kung kanus-a kini nagsugod, ug isulti pud kanako kung kanus-a kini natapos.” Ingon ko, “Nagatoo ka ba sa Pulong?”

Ingon siya, “Nagatoo ko.”

¹²² Ingon ko, “Maayo. Karon, sa Adlaw sa Pentecostes kaniadto, nagatoo ka ba nga mao kadto ang pagsugod sa apostolikanhong kapanahonan?”

Ingon siya, “Nagatoo ko.”

¹²³ Ingon ko, “Kung ingon niana, ang mamumulong, nga si Apostol Pedro, ang misulti niini nga mga pulong.”

Ug hinumdumi, miingon si Jesus, “Ang si kinsa man nga magataktak og usa ka Pulong gikan Niini, o magadugang og usa ka pulong ngadto Niini, pagataktakon ang iyang bahin gikan sa Basahon sa Kinabuhi,” usa kana ka magwawali o usa ka tawo nga nahisulat na ang ilang ngalan diha sa Basahon.

Ingon ko, “Miingon si Pedro, ‘Maghinulsol kamo, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa inyong mga sala, ug madawat ninyo ang gasa nga Espiritu Santo. Kay ang saad alang kaninyo, ug sa inyong mga anak, ug sa tanang atua sa halayo, bisan ang kapid-an nga pagatawgon sa atong Ginoong Dios.’ Kanus-a man kini natapos kung ingon-ana? Nagapadayon gihapon kini sukad pa sa una.”

Tungod man gud kana sa pundok sa mga banog nga nangahimong mga buitire, ug nagalukso-lukso alang sa kung unsang patay na nga lawas sa mananap, nga gipatay niadtong miagi sa nga kapanahonan. Oo. Dili na lab-as nga manna nga gikan sa Kalangitan, dili na. Ayaw man nila Niini. Dili sila . . . Dili gani sila makapahigayon og panagtigum sa pag-ampo. Dili gyud mga agila, sa sugod pa lang; mga mahuyang, mga dili lig-on; og nagalukso-lukso na lang.

¹²⁴ Ingon niana usab ang atong modernong denominasyon, nga nagadepende ra sa edukasyon sa kung unsang teolohiya nga hinimo sa tawo, nga ginasaysay pahilayo ang tanan niining mga Butang, ug ginadawat pud nila. Dili nila hinoon dawaton ang Pulong nga nag-ingon, “Si Jesus Cristo mao sa gihapon kagahapon, karon, ug hangtud sa kahangturan.” Dili nila dawaton ang Malaquias 4. Ug dili niya dawaton ang tanang uban pa niini nga mga saad nga nakapahinungod niini nga panahon,

ug kung unsa ang gisulti bahin sa kapanahonan sa iglesia. Kung unsa nga gisulti sa propeta, “Sa panahon sa kagabhion motungha ang Kahayag,” og ayaw nilang dawaton Kini. Gusto ra nilang maglukso ngadto sa kung unsa ang gipatay kaniadto pa sa Pentecostal nga organisasyon, usa ka gatus na ka tuig ang milabay, nga nagakaon sa halos dunot na nga manna. Husto kana. Dili na maayong kaonon.

¹²⁵ Matikdi n’yo, ang iglesia ingon na gayud ka karnal, nga nagakaon kini mismo sa usa ka dubok na nga karne sa kalibutan, sa patay na nga mga butang nga iya sa kalibutan, sama lang sa ginabuhat sa buitire. Tungod sa pulitika sa iglesia, dili nila ginatugotan nga magpadala ang Espiritu Santo og usa ka tawo ngadto sa iglesia; kinahanglan uná nilang magkaaduna og pulitika ug hibaloong kung dawaton ba siya o dili sa denominasyon. Husto kana. Sama na sila sa kalibutan. Nagapangbisti sila nga sama sa kalibutan. Sama na sila sa kalibutan kung tan-awon. Nagalihok sila nga sama sa kalibutan. Sila’y mga buitire, nga sama sa kalibutan. Sila’y mga tapulan, mahuyang, og mga nagapakig-kompromiso. Ingon na niana sila.

Nakakita na ba mo sukad og agila nga nagapakig-kompromiso? Wala, sir. Walay pagpakig-kompromiso diha kaniya. Mao usab sa usa ka tinuod nga Cristohanon. Dili siya mahuyang. Mangita gayud siya hangtud nga makaplagan niya Kini. Amen. Oo, sir. Pangitaon gyud niya ang iyang Pagkaon. Lab-as man nga Manna ang iyang gusto. Mokanaug siya dinha ug magakalot hangtud nga makaplagan niya Kini. Molupad siya sa mas hataas ug mas hataas pa. Kung wala ma’y bisan usa dinhi nga walog, mas mopaitaas pa siya. Sa diha nga nagalupad ka ngadto sa mas itaas, mas daghan pa ang imong makita. Busa panahon na para sa mga agila sa niining panahon nga molupad ngadto sa mas hataas pa, magakalot pa alang sa mga saad sa Dios, og dili nga magkaon sa pagkaon nga iya sa buitire nga dugay nang patay pipila ka tuig na ang milabay; gumula kamo gikan niana.

¹²⁶ Ang pulitika, nga nagapili og usa ka tawo ug nagapili kung kinsay papahawaon, ginaingon ang *ingon-mi*, *ingon-ana*, o *uban* pa, ug wala na’y katungod ang Balaang Espiritu sa iglesia. Wala na’y mga panagtigum sa pag-ampo, wala na’y mga pagdanguyngoy sa pagpangamuyo sa Dios aron matuman ang Iyang Pulong! Wala na nagatoo nga ang Pulong mao sa gihapon kagahapon, karon, ug hangtud sa kahangturan! Nangahimo na silang buitire, nanagtukod og denominasyon, gipanglista ang ilang ngalan diha sa libro; ug nangahimo nang tapulan ug mga huyang na, ug nanaglingkod na lang dinha nga nagpakatagbaw sa kung unsang matang sa patay’ng dubok na nga karne. Ug, dayon, nagpaka-banog na lang unta siya nga kapareho sa igsoon niyang agila, ang propeta nga naghatud sa tinuod nga Pulong ug nagpadayag Niini.

¹²⁷ Nagasalig na lang sa halos dunot na, nga teolohiya nga hinimo'g-tawo. Asa man niya nakuha kana? Sa kung unsang hinimo'g-tawo nga programang pang-Sunday school, nga kaniadto pang gipatay sa kung kinsang magtutudlo sa seminaryo para kaniya, nga ginasultihan siya nga, "Milabay na ang mga adlaw sa milagro. Wala na ma'y ingon niana nga butang sama sa bautismo sa Espiritu Santo. Binuang ra Kana tanan." Buut mo bang isulti kanako nga mokaon ang agila og ingon niana? Dili gyud niya mahimo kana. Dili, sir.

¹²⁸ Dili usab mokaon ang usa ka Cristohanon nianang patay'ng dubok na nga mga karne nga gikan sa karaang denominasyonhong mga doktrina og mga ingon-ana. Pulong sa Dios ang ilang gusto, nga lab-as, ang saad sa niining panahon. Nagsaad ang Dios og mga rabbit sa mga adlaw ni Luther kaniadto. Nagsaad pud Siya og ubang mga butang sa mga adlaw sa uban pa. Apan sa karon ang gisaad Niya kanato mao ang bug-os og kumpletong Pagkaon, ang tibuok Listahan sa pito ka putahe, tungod kay naablihan na man ang tanang Pito ka Selyo, ug andam na ang tanan-tanan alang sa Pulong sa Dios, para niadtong mga makadawat! . . . ? . . .

¹²⁹ Mga banog nga nagalukso-lukso na lang nga sama sa mga buitire. Oh, grabe! Palandunga n'yo kini, pagka-kuyaw na gayud, sa—sa panahon. Maingon nga dugay nang giwala sa banog ang iyang ilhanan ingon nga usa ka banog, mao man usab ang iglesia nga dugay nang giwala ang iyang ilhanan ingon nga usa ka mas ubos ra nga (langgam) nga igsoon sa agila, nga mga propeta sa Dios.

Tigdala mismo kaniadto sa tinuod nga pulong, sa pagpamatarung; dayon, nahimong tigdala sa pagpabalaan; dayon, nahimo na pud nga tigdala sa bautismo sa Balaang Espiritu, og pagpasig-uli sa mga gasa. Apan, sa pagpadayon sa Dios: ug siya usab nagaatras, gapaningkamot nga mokaon sa kung unsang, manna sa nangagi nang panahon, nga dunot na, og dili na maayong kaonon.

Ang usa ka tinuod nga agila sa niining panahon nasayod nga kaniadto maayo pa man kana. Apan aduna na man kita niana, og may dugang pa, hangtud nga si Jesus Cristo nadayag diha sa kahupnganan sa Iyang gahum, sumala sa Iyang gikasaad nga mahitabo sa niining kaulahiing adlaw.

¹³⁰ Siya'y usa na ka uga nga tipaka karon. Milabay na kini; ang Espiritu sa Dios milabay na kaniya, tinuod kana. Ug mao nga dili, dili siya mamahimong manununod kauban sa gipanghimatud-an nga Binhing Pulong. Siguradong dili gyud siya mamahimong manununod. Dili gyud siya mahiuban sa Pagsakgaw. Mamahimo ra siyang miyembro sa iglesia, nga mabanhaw sa ikaduhang pagkabanhaw, og pagahukman sa kung unsay iyang napatalinghugan.

Kung ania kamo karong gabhiona, nga usa lamang ka miyembro sa iglesia, unsa kaha ang mahimong hukom kaninyo, sa diha nga kinahanglan na natong tanan nga moatubang didto ug magpamatuod nga napaminawan mo ang Kamatuoran? Kita n'yo?

Wala na siya nagalupad ngadto sa kawanangan, ngadto sa wala-masayri nga mga dapit, sa supernatural, kon diin ang mga Gahum ug kahitas-an, ug mga saad sa Eternal nga Pulong sa Dios mahimong posible, “ang tanang butang ngadto kanila nga nagatoo.” Dili siya motoo Niana, ingon siya. Motugdon ra siya balik ngadto sa kabli sa telepono, ug moingon, “Ginaingon man gud sa akong denominasyon nga okey ra man ang mga rabbit.” Bisan giulod na ang mga niini, apan, sa gihapon, “Maayo man kana,” kita n'yo. Dinha siya nagasalig.

¹³¹ Ang Pentecostal sama ra usab sa iyang denominasyonhong igsoon nga buitire, nga nagalingkod karon diha sa dakung “lingkoranan sa magtatambag nga mga dili-diosnon,” mao gyud, nagapaminaw sa iyang kalibutanong, pulitiko nga mga pangulo nga nagapakaon kaniya og patay na nga mga rabbit nga pagkaong iya sa buitire, pagkaon nga sa kaniadto pa, singkwenta ka tuig na ang milabay. Ingon na gyud niana ang kahimtang sa iglesiang Pentecostal. Oh, grabe!

¹³² Maingon nga si Sarah kaniadto naninguhang ipahitabo ang supernatural nga saad pinaagi—pinaagi sa personal nga pagpili kang Hagar, mao usab ang iglesia, nga gapaningkamot nga magkaaduna pa og rebaybal. Ang atong bantugang mga ebanghelistas sa mga nasud karong panahona nagaingon, “Usa ka rebaybal sa atong panahon! Usa ka rebaybal sa atong panahon! Kamong mga Methodist, mga Baptist, mga Pentecostal, maghiusa kamong tanan.” Unsaon man ninyo pagpakabaton og rebaybal sa lab-as nga Manna diha sa usa ka dugay nang, patay, pang-buitire nga pagkaon? Unsaon man ninyo sa pagpakabaton niana, og rebaybal sa atong panahon?

Ang rebaybal mamahimong ubos ra kaayo nga dili gayud nila mahibaloan nga nahitabo na diay kini.

¹³³ Ang ingon sa mga Pentecostal, “Oh, adunay dakung butang nga mahitabo.”

Nagakahitabo na mismo kini, ug wala nila kini mahibalo-i. Kita n'yo, ingon niana. Kita n'yo? Oo, sir. “Kay diin gani ang Gipatay'ng-Lawas, atua didto magakatapok ang mga agila,” ingon ka sigurado gayud. Kita n'yo? Ingon niana ang pagkasulti Niini. Unsa man ang Gipatay'ng-Lawas? Ang Pulong. Siya mao ang Pulong, ang Gipatay'ng-Lawas, si Cristo! “Si Cristo nga ana sa kaninyo,” ang mao sa gihapon kagahapon, karon, ug hangtud sa kahangturan. Tinuod gayud Kini!

¹³⁴ Si Sarah, nga gipaningkamotan nga mamatuman gayud ang mga saad, nakita n'yo, diha sa usa ka dakung . . . sama sa iglesia

niining panahon, “usa ka dakung rebaybal sa atong panahon,” (pinaagi sa unsa?) pinaagi sa usa ka tinuis nga saad. Unsaon man ninyo pagpahigayon niana, nga wala ma’y organisasyon nga sukad gipanalanginan sa Dios?

Wala gayud Siya migamit sukad-sukad og usa ka organisasyon. Sa dihang migula ang usa ka mensahe, ug nag-organisa sila, namatay dayon kadto. Ginahagit ko ang si kinsa mang magsasaysay nga ipakita kanako kung asa kadto nakabangon pag-usab. Namatay mismo dayon kadto ug nagpabilin na lang kini didto. Ang Dios padayon ra nga migawas niadto nga tigdala, paingon sa usa pa; pagawas mismo sa Lutheran, paingon sa Methodist; dayon pagawas na sab sa Methodist, paingon sa mga Pentecostal; karon migawas na usab Siya sa mga Pentecostal, paingon sa Binhi.

¹³⁵ Tungod kay, kinahanglan man nga mamahimo kining Binhi. Dili n’yo mahimong daugon ang kinaiyahan. Wala na’y, bisan unsa pa man nga mahitabo kondili ang Binhi ra, busa maipagawas na sa Binhi ang Kaugalingon Niini. Siya mao sa gihapon kagahapon, karon, ug hangtud sa kahangturan; ang mao gihapon nga Haliging Kalayo, nga nagapakita sa mao gihapon nga mga ilhanan, sa mao gihapon nga Gahum, sa mao gihapon nga Dios, sa mao gihapon nga mga milagro, sa mao gihapong butang, nga nagpanghimatuod sa Pulong ug sa Biblia, sa ingon ka eksakto. Siya mao sa gihapon kagahapon, karon, ug hangtud sa kahangturan. Nagapanguna Siya, karong gabhiona. Tabangan unta kita sa Dios nga makita Kana ug toohan Kana! Oo!

¹³⁶ Kita n’yo, si Sarah, ang iglesia, nga personal nga nagpili kang Hagar. Wala kadto nagpulos. Di ba? Wala. Ang personal niyang gipili nga pundok dili usab magpulos, sa karon. Mga doktor, ug mga Ph.D., ug mga L.L.D., dili gayud magpulos. Mangapakyas ang tanang tigdala.

Napakyas man si Luther kaniadto, sama ni Hagar. Unsa ma’y gibuhat ni Hagar? Gihatag ni Hagar ang iyang anak ngadto sa dughan sa ubang babaye (husto ba kana?), aron mao’y magpadaku sa iyang anak. Gibuhat kadto ni Hagar; gihatag ang iyang anak, ang iyang bugtong anak, ngadto sa dughan sa ubang babaye (dili sa inahan niini mismo), aron padakuon kadto. Mao gihapon ang gibuhat ni Luther kaniadtong gihatag niya ang iyang anak, ang pagpamatarung, ngadto sa usa ka denominasyon nga nagbinuang niini, eksakto gayud, aron padakuon kini.

¹³⁷ Napakyas usab si Wesley sama sa pagkapakyas ni Sarah kaniadto, nga giduhaduhaan ang supernatural nga Pagkahimugso ingon nga mao ang bautismo sa Espiritu Santo, sama sa gibuhat ni Sarah didto sa kahoy’ng encina. Sa diha nga gipaila si Wesley ngadto sa supernatural, pag-abot na sa kapanahonang Pentecostal ug gipaila si Wesley ngadto sa mga

pagsulti og laing mga pinulongan ug sa tanan Niini, gikatawan nila ug gibiyabiayan Kini. Kamong mga Church of Christ, kono, ug kamo, ug kamong mga Baptist, ug mga Presbyterian, ang matag usa kaninyo, wala ninyo gidawat, Kini, ug gisalikway n'yo Kini. Oo. Unsa ma'y gibuhat mo, Wesley? Gibaligya mo ang imong anak ngadto sa usa ka organisasyon, ug namatay kadto ug nalaglag. Eksakto gayud kana.

¹³⁸ Apan, ang Pulong, ang tinuod nga Pulong nagpadayon ra mismo. Wala Kini nagpabilin sa nianang organisasyon. Nagpadayon Kini paingon sa pentecostal, ug naghatud pa kini og dugang. Mas migulang pa Kini nga Anak, sama sa Binhi nga anaa sulod sa tagoangkan; ug, wala magdugay, misugod Kini sa dugokan, dayon nagkaaduna og mga baga, ug nagkaaduna'y ulo ug mga tiil.

Ug, wala magdugay, miabot na Kini sa punto nga nahimugso Kini. Husto kana. Busa, sa ingon nianang paagi usab nahimong gulang ang Iglesia, mao gihapon.

¹³⁹ Nagduhaduha si Wesley sama gayud sa gibuhat ni Sarah kaniadto didto sa kahoy. Miingon siya. . . Sa diha nga ang Manulonda sa Ginoo, usa ka Lalaki, nga nakabisti sama sa usa ka . . . O, usa ka Manulonda, ang Dios, kadto, Mismo. Si Elohim, nga nakabisti nga sama sa usa ka tawo, mitindog didto nga dunay mga abog ang Iyang bisti, ug miingon nga gihatag na Niya ang maong saad; human nga nubenta anyos na si Sarah, ug si Abraham usa na ka gatus.

Ug si Sarah mikatawa nga hilum, ug miingon, “Unsaon man pagkahitabo niini, nga ako ug si Abraham wala na man, bueno, wala na man kami'y pisikal nga pagpakigrelasyon, sama sa mga batan-on pa, tingali'g sulod sa baynte na ka tuig.” Siya'y halos usa ka gatus na ang panuigon kaniadto. Miingon, “Ako, magkaaduna pa ba og kalipay sa akong ginoo, ako nga tigulang na, ug siya nga tigulang na, usab? Ug patay na man ang iyang agianan sa kinabuhi, ug nag-uga na ang akong tagoangkan. Patay na man ang akong suso; patay na ang agianan sa gatas. Unsaon ko man pagpakabaton niana?”

¹⁴⁰ Miingon ang Dios, “Gisaad Ko na kana. Maipanganak gyud siya, bisan pa man!”

¹⁴¹ Mao usab si Wesley. “Unsaon man namo pagdawat nianang mga pagsulti sa laing mga pinulongan, ug nianang Balaanong pagpang-ayo, ug mga ingon niana. Dili na kana para kanamo sa niining panahon.”

¹⁴² Miingon ang Dios, “Ako nagsaad man, ‘Sa kaulahiing mga adlaw igabubo Ko ang Akong Espiritu sa tanang unod.’” Nagsaad Siya nga buhaton kana, ug gituman Niya ug gibuhat gihapon kadto, bisan pa man. Ug ang iglesiang Wesleyan, uban sa tanan niyang gagmay'ng mga igsoon nga pollen, nga mga Baptist, mga Presbyterian, ug Church of Christ, ug mga

Nazarene, Pilgrim Holiness, ug United Brethren, ug unsa pa man, nangamatay gayud uban niini mismo. Ug nagpadayon gihapon ang Iglesia.

Karon unsa ba'y gibuhath sa Pentecostal? Nag-organisa, sama mismo sa tipaka. Mao gihapon ang gibuhath niini. Giorganisa niini ang ilang kaugalingon, gipahimutang ang ilang kaugalingon ingon nga usa ka tipaka. Husto kana.

¹⁴³ Ang Pentecostal usab sama lang ni Maria. [Blangko nga bahin sa teyp—Ed.] . . . niadtong fiesta sa pentecostes, matikdi n'yo kung unsay gibuhath ni Maria. Unsa ma'y nabuhath nga sayup ni Maria? Didto sa fiesta sa pentecostes, kaniadto, naatubang niya ang usa ka pundok sa mga tawong hataas og katungdanan, mga sacerdote. Sa diha nga, ang iyang Anak, wala na niya makit-i Siya sa bisan asa. Ug mibalik si Maria, sulod sa tulo-ka-adlaw nga pagpanaw.

Nabiyaan niya si Jesus. Sama sa modernong iglesia karong panahona, mga tulo ka pilo nga makalima, o baynte-singko, nga mibiya ang iglesia, mga singkwenta ka tuig na ang milabay, o setenta'y-singko.

¹⁴⁴ Nabiyaan Siya didto sa fiesta sa pentecostes. Mibalik si Maria uban si Jose, tulo na ka adlaw, nga nagapangita Kaniya. Nagsige siya'g pangita Kaniya; og wala gyud nila Siya makita.

Sa nakaplagaan niya Siya. Unsa ma'y iyang nakaplagaan? Nakaplagaan niya Siya sulod sa templo, nga nagahisgot sa Pulong sa Dios uban sa mga sacerdote. Ug didto mismo sa atubangan sa mga sacerdote, niadtong mga dungganon, gipaubos ni Maria ang tabil. Gibuhath gayud niya ang butang nga dili niya unta angay'ng gibuhath.

Gitawag siyang, "Dios; ang inahan sa Dios"? Ang usa ka inahan aduna man unta og mas labaw nga kaalam kaysa sa iyang anak.

Ug ingon siya, "Ang Imong amahan ug ako nagsige og pangita Kanimo nga nagpangluha, sa adlaw ug gabii." Huh! "Ang Imong amahan ug ako," nagapamahayag nga dili diay supernatural ang pagkahimugso, nga si Jose kono ang amahan ni Jesus. Gilimod ni Maria ang supernatural nga pagkahimugso.

Gidawat na gyud sa mga Pentecostal ang pagsulti sa laing mga pinulongan. Gilimod nila ang Pagkahimugso sa Pulong. Eksaktong ingon niana ang gibuhath niini. Dawaton ang kadaghanan Niini, apan dili na dawaton ang tanang uban pa Niini. Gilimod niini ang Pagkahimugso sa Pulong, sama sa gibuhath ni Maria. Apan, matikdi, wala na'y unsa man nga mga organisasyon human Niini.

¹⁴⁵ Matikdi n'yo ang Pulong Mismo, nga, dose anyos, usa pa lang ka gamay'ng bata sulod sa tipaka, miingon Siya, "Wala ba kamo

mahibalo nga Ako kinahanglan magabuhat sa buluhaton sa Akong Amahan?” Gitul-id sa Pulong ang iglesia, dinha mismo.

146 “Para sa unsa man nga ginabuhat mo kining tanan nga mga butang? Nasayod ka nga dili mo mahimong buhaton ang *ingon niini*. Sirhan na namo ang among mga pultahan; dili ka na namo pasudlon.”

147 “Kay wala ba kamo mahibalo nga Ako kinahanglan magabuhat sa buluhaton sa Akong Amahan?” Kita n’yo? Sigurado, sigurado gayud, ang tinuod mismo nga supernatural!

148 Basta, niya na lang giangkong nga Siya’y anak ni Jose, nga usa ra ka tawo. O, sa gibuhay sa mga Pentecostal, nga giangkong nga Siya’y “usa sa tulo.” Whew! Kabalo ko nga makasakit kana, “usa sa tulo.” Apan Siya man kanang tulo, sa Usa ra. Siya’y dili usa sa tulo. Apan ang mga Pentecostal, “Oh, oo, Siya mao ang Anak sa Amahan, sa Espiritu Santo, dayon . . .” Oh, my!

Apan ang tinuod, matuod nga Pulong nagasulti mismo, ug miingon, “Dili kana tulo. Usa ra kana sila.” [Blangko nga bahin sa teyp—Ed.] Amen. Wala ba mo mahibalo sa Pulong sa Dios? Ayaw n’yo kana himoa nga tulo; kondili Usa ra.

149 Matikdi, wala na’y mamahimong tigdala, nga mga inahang iglesia, mga denominasyon, human niining tigdala nga tipaka.

150 Tungod kay, human sa tipaka, wala na ma’y, bisan unsa nga mahibilin nianang tungora kondili ang Lugas na lang. Husto ba kana? Siguradong ang Lugas na lang. Siguradong mamahimo kining mao ra mismo nga matang nga gilubong kaniadto sa yuta, si Jesus Cristo nga mao sa gihapong kagahapon, karon, ug hangtud sa kahangturan, usa ka Espiritu nga moabot sa Pangasaw-onon aron buhaton ang mao gihapong mga butang nga gibuhay Niya kaniadto. Kita n’yo? Mao kini ang pagpagawas sa Binhi pag-usab.

151 Ang Pulong, nga bata pa lang, nanulti na para sa Kaugalingon Niini, “Ug wala ba kamo mahibalo nga Ako kinahanglan magabuhat sa buluhaton sa Akong Amahan?” Huh!

152 Mao kana ang sekreto sa Mensahe karon, eksakto gayud, “ang buluhaton sa Amahan.” Unsa ma’y buluhaton sa Amahan?

Mahunahuna n’yo ba kung unsay buluhaton sa Amahan kaniadto, diha Kaniya? Ang tumanon kung unsay gikasulti ni Isaias, “Usa ka ulay ang manamkon.” Ang tumanon kung unsay gikasulti ni Isaias, usab, “Ang piang molukso sama sa usa ka lagsaw,” ug mahitabo kining tanang mga butanga. Sama sa gikasulti ni Moises, “Ang Ginoo nga inyong Dios magpatindog og usa ka Propeta, sa taliwala ninyo, nga sama kanako.” Buluhaton kadto sa Amahan, nga tumanon kadto nga Pulong.

Bueno, nahitabo gani kadto pinaagi niadtong mga lindog, niadtong natural nga kababayan-an; unsa pa kaha sa mga lindog niining espirituwal, nga iglesiang kababayan-an? Ang mga iglesia nagakahulogan og kababayan-an, ang *kababayan-an* nagakahulogan og “mga iglesia,” diay. Husto ba kana?

Kung ingon-ana unsa na karon? “Kinahanglan mamuhat kita sa buluhaton sa Amahan,” ang singgit sa Trigo, ang Lugas. Oo, sir. Unsa ma’y kinahanglan buhaton? Panghimatud-an ang Malaquias 4, panghimatud-an ang Lucas 17:30, panghimatud-an ang Mga Hebreohanon 13:8, panghimatud-an ang San Juan 14:12, panghimatud-an ang tanan Niyang Pulong. Panghimatud-an ang Mga Hebreohanon, ang buut kong ipasabot...ang Pinadayag, ang ika-10 nga kapitulo, mahitungod sa pag-abli sa Pito ka Selyo, ug mahitungod sa mga misteryo sa Dios; bisan ang mahitungod sa binhi sa serpente, ug ang tanan, igapadayag na; ang mahitungod sa kaminyoon ug panagbulag ug ang tanang uban pa niining mga misteryo nga dugay nang gililong ilalum sa mga haligi sulod sa niining daghang mga katuigan, gikan sa mga teologo ug uban pa, apan mao na kini ang panahon. Mao kana ang buluhaton sa Amahan.

Sa hunahuna n’yo ba dawaton nila Kini? Ang gusto man nila nga mamahimong dungganon, ug moingon, “Ang among denominasyon wala man nagatudlo Niana.” Apan ginatudlo sa Biblia. Husto kana.

¹⁵³ Ginapanghimatud-an gyud sa Dios nga tinuod Kini. Oo, nagakatuman na Kini sa niining kapanahonan, sa diha nga ang Pito ka Selyo...O, ginapamatud-an lang nga ang mga denominasyon nahimong mga tigdala lamang, mao kana ang usa pa sa mga buluhaton sa Amahan, ang magpamatuod. Ug ang buluhaton sa Amahan karon mao ang ipakita kaninyo nga ang mga denominasyon dili Iya. Sila’y mga sistemang hinimo’g-tawo nga nagasalikway sa Pulong. Oo. Himatikdi.

Moingon mo, “Bueno, si Maria diay, ang bir-...halangdong birhen!”

¹⁵⁴ Didto sa krus, wala gayud siya gitawag ni Jesus nga, “inahan.” Gitawag Niya siya nga, “babaye,” nga tigdala, dili nga inahan. Kita n’yo? Tinuod, usa siya ka tigdala sa Pulong, apan dili siya ang Pulong. Si Jesus mao ang Pulong. Oh, oo.

¹⁵⁵ Matikdi, usab, nga si Maria wala naila nga kauban Niya diha sa pagkabanhaw. Namatay si Jesus ug nabanhaw, tungod Siya man mao ang Pulong. Tigdala lamang si Maria. Namatay siya, ug nagpabilin ra sa lubnganan. Husto kana. Busa, siya’y usa ra ka tigdala, dili nga Iyang inahan, dili Dios. Siya’y usa lamang ka tigdala sama sa mga iglesia. Husto kana. Nagapakita lang nga usa ra gyud siya ka tigdala, dili nga ang Pulong.

¹⁵⁶ Magtapos na kita sa pagsulti niini. Oh, Pentecostal nga mga banog, nga nagalukso-lukso na lang nga sama sa mga buitire,

nagapakig-ambit sa kalibutan sama lang sa ginabuhat sa tanang uban pa kanila, “adunay dagway sa pagkadiosnon, sa ingon ka igo aron malimbongan ang mismong mga Pinili kon mahimo pa, apan ginapanghimakak ang Gahum niini,” sumala sa ginasulti sa propeta dinhi. Usa mismo ka hingpit nga ehemplo bahin sa gisulti sa Pulong sa Dios nga mahitabo kini sa kaulahiang mga adlaw, usa ka kapanahonan sa iglesia sa Laodicea, “hubo, buta, makaluluoy, kabus, alaut, ug wala makahibalo niini; nagapamahayag nga siya’y bantugan ug adunahan, ‘wala nagkinahanglan og unsa man.’” Ug wala masayod nga nausab na diay siya gikan sa pagka-banog, nga kaparehong igsoon unta sa propeta, aron ipapabilin nga husto ang Pulong sa Dios; nahimo na siyang usa ka buitre, ug ginapakaon na lang ang iyang mga tawo og patay na nga eklesiastikal nga mga rabbit. Husto gayud. Pagmata na kamo! Aba, unsaon man ninyo pagkahimong maila nga, o mga manununod uban sa mga agila, kon aduna pa mo’y mga ingon-anang butang sa niining halangdong takna kon diin haduol na ang Pagsakgaw?

¹⁵⁷ Oh, Cristohanon, oh, magtotoo, kung kamo dili pa bug-os nga magtotoo, padayon lang mo sa pagtambong sa mga panagtigum bisan sa makadiyut lang (mahimo ba?), aduna kita’y butang dinhi nga nagatoo ko nga gusto sa Ginoo nga mahibaloan ninyo.

Nagkagabii na gyud; dili na ako mahimong magpadayon pa. Kinahanglan ko nang tapuson, ug siguro humanon na lang ugma sa gabii. Apan, tan-awa, iduko nato ang atong mga ulo sa makadiyut.

¹⁵⁸ Ayaw kong matikdan ninyo kung unsa nga gramatika ang akong ginagamit, apan gusto ko nga patalinghugan ninyo bisan sa makadiyut lang ang akong gisulti. Ingon ka klaro kini nga makasabot kamo niini, sigurado ko, kung gustohon ninyo. Kung ania kamo karong gabhiona, ug wala pa kamo og ingon-ining kasinatian. . .

Wala ko nagaingon. . . Moingon mo, “Nakasayaw na ako diha sa Espiritu, og naglukso-lukso.” Oo, ginabuhat usab kana sa mga banog, sama sa mga uwak ug mga buitre. Dili ingon-ana ang akong ginapangutana.

Unsa man ang ginakaon ninyo? Asa man ninyo ginakuha ang inyong pang-adlaw-adlaw nga pagkaon? Asa ba kamo nagakaon, sa Pulong ba sa Dios o sa kung unsang dugay nang dubok nga karne nga sa kaniadto pa, daghan nang mga katuigan ang milabay? Ang kasinatian ninyo, bisan karong gabhiona, pinaagi ba sa usa ka butang nga inyong gipunit daghan nang mga tuig ang milabay; o lab-as ug bag-o ba kana karong gabhiona, bag-ong Manna nga bag-ohay lang nahulog gikan sa Langit, ug ginapakaon ninyo ang inyong kalag Niini, og nagahulat na pud pagka-ugma para sa usa na usab nga mas lami? Kung dili pa

kamo ingon niana, karon samtang nakaduko ang inyong mga ulo ug nakapiyong ang inyong mga mata, ug nakaduko ang inyong mga kasingkasing, pangutan-a ninyo ang inyong kaugalingon sa niining sinsero nga pangutana. Ug dili para kanako, kondili para sa Dios, mahimo n'yo bang ipataas ang inyong kamot sa usa ka testimonyo, sa pagsulti niini, "Dios, ihan-ay ang akong kalag ug ang akong espiritu, aron nga magakaon ako sa Pulong sa Dios lamang." Mahimo n'yo bang ipataas ang inyong kamot, moingon...Panalanginan kamo sa Dios. Panalanginan kamo sa Dios.

¹⁵⁹ Wala ako masayod kung pila ba gayud ang ania, dinhi, karong gabhiona. Dili man gud ko maayong mobana-bana sa gidaghanon sa tawo, apan masulti ko nga dili mominus sa usa sa tulo ka bahin, o sobra pa, ang nagpataas sa ilang mga kamot, nga gusto nilang maihan-ay ang ilang mga kalag. Atong hinumduman sa pag-ampo karon samtang ginaduko nato ang atong mga ulo.

¹⁶⁰ Minahal nga Dios, ang katungdanan ko mao lamang ang pagsulti sa Pulong. Ug pinaagi niining diyutay og yano nga mga samingay, diyutay'ng mga pagtipo, nahibaluan sa mga tawo nga ang usa dili diay mamahimong manununod uban sa usa pa. Ug nasayod kami nga sa kaulahiang mga adlaw adunay mga tawo nga pagasakgawon paingon sa Kalangitan, ug ang uban kanila ania pa dinhi pagmoabot na si Jesus. Ug nagapaabot kami Kaniya nga moabot bisan niining gabhiona.

¹⁶¹ Ug nahunahuna ko nga traynta, mga traynta o traynta'y-tres ka tuig na ang milabay, miluhod ako kaniadto dinhi siguro mga ingon niini nga oras sa kagabhion, mga alas-nuebe o alas-diyes, nagaampo para sa usa ka amahan nga nahisalaag. Karong gabhiona, Ginoo, nagaampo ako para sa daghang mga amahan, daghang mga inahan, ug mga igsoong lalaki ug babaye. Maluoy Ka unta, minahal nga Dios? Ulahi na karon para sa akong amahan nga mohimo og unsa man mahitungod niini; dugay na siyang milabang sa mga utlanan niini nga kinabuhi. Ug sa dili madugay, Ginoo, molabang usab kaming tanan niana nga dalan. Ako, usab, kinahanglan nga mosubay niana nga dalan. Matag lalaki ug babaye, batang lalaki man o batang babaye, nga ania dinhi, kinahanglan usab nga mosubay niana nga dalan. Ug tulubagon namo kung unsay ginabuhat namo sa Pulong sa Dios.

¹⁶² Daw unsa ra ka gamay kadto nga tawo, sa atubangan ni David, kadtong gilud-an siya niini! Daw unsa lang ka gamay ang pagdahum niadtong mga tawo, nga nagluwa kang Jesus nga Pulong, pag mobalik na Siya, ug kadtong mga nagdughang Kaniya. Gamay ra kaayo ang pagtan-aw sa mga tawo nga molakaw ra palayo dinhi ug bisan nakita na ang...dili pinaagi sa kung unsang halangdon nga mga Griyegong pulong, ug uban pa, kondili sa tin-aw mismong paagi nga ginatudlo kanamo ang mahitungod sa Dios nga Magbubuhat; nga makita mismo

ang mga tigdala sa Pulong, ug makita ang Pulong Mismo, ug mailhan ang panahon nga among gikinabuhian, ug nga ania na ang panahon sa ting-ani.

¹⁶³ Minahal nga Dios, ayaw itugot nga talikdan lang namo Kini, tungod lang sa kung unsa nga kabuangan sa kalibutan, kondili tugoti kami karong gabhiona nga dawaton Siya sa tibuok namong kasingkasing. Ginoo, buhati sa sulod nako og usa ka maayo nga espiritu, ang Espiritu sa Kinabuhi, aron mahimo kong toohan ang tanan Mong mga Pulong, ug dawaton si Jesus nga Pulong, ang mao sa gihapon kagahapon, karon, ug hangtud sa kahangturan, ug toohan karon ang bahin nga gigahin alang niini nga kapanahonan. Itugot kini, Ginoo. Ginapangamuyo ko kini sa Ngalan ni Jesus.

¹⁶⁴ Ug karon hangyoon ko ang matag usa kaninyo, samtang ania pa kamo dinhi ug nagapamalandong niini, nga matinuuron gayud. Wala kami iglesia aron apilan ninyo. Aduna kami og bautismohan dinha para sa pagbaustimo, “Ang tanan nga nagtoo gibautismohan,” kung kamo wala pa mabautismohi sa Cristohanong bautismo. Dili kana nagakahulogan og pagwisik-wisik, pagbubo; nagakahulogan kana og pagtuslob. Dili sa titulo nga Amahan, Anak, Espiritu Santo, kondili sa Ngalan ni “Jesus Cristo,” sama sa pagbautismo sa tibuok iglesia kaniadto, hangtud nga gipaila sa iglesiang Katoliko niadtong 303 ang tulo ka dios ug tulo ka matang sa bautismo, sa trinidad nga titulo. Kung wala pa kamo nakabaton niana, ugma sa buntag sa alas-diyes aduna ma’y mga bisti ug mga ingon-anang butang nga nagahulat kaninyo dinha.

¹⁶⁵ Mahimo n’yo bang moduol ug magpasakop kang Jesus Cristo, og dili kanamo. Wala gani kami og iglesia dinhi para moatiman kaninyo. Tambong mo sa bisan unsang iglesia nga gusto ninyo, asa man kamo gikan, apan, kung mahimo, tohi kini nga Pulong. Nagatoo ba mo niini? Moingon, “Amen.” [Nagaingon ang kongregasyon, “Amen.”—Ed.] Panalanginan kamo sa Dios. Hinaut nga inyong buhaton . . .

¹⁶⁶ Kon adunay unsa mang butang nga among matabang kaninyo, ania ra kami para buhaton kana.

¹⁶⁷ Karon, nasayod ko nga adunay mga masakiton dinhi. Pero wala na kita’y oras, karong gabhiona, para sa linya sa pagpaampo. Tingali’g mapahigayon pa nato kana, bisan pa man. Gusto ko nga ang matag usa kaninyo adunay buhaton para kanako. Nagalingkod man mo nga duol sa kang kinsa man; ipandong ninyo ang inyong mga kamot sa niana nga tawo.

Ug walay pagduhaduha nga ginapandong ninyo ang inyong kamot nganha sa usa ka agila, tingali’g usa ka agila nga nagakaon kaniadto sa kung unsang pagkaon nga iya sa buitre sa kon asa man; og napul-an na niana. Ayaw na nila niana. Gusto na nilang mogawas gikan niana. Kasukaon ug gikapoyan na sila

niana. Ania sila karong gabhiona ug nakita kung unsa gayud ang angay'ng kaonon sa mga agila, ang Pulong, ug adunay buhi nga Cristo nga nagapuyo sa taliwala nila, nga ginapakita ang Iyang Kaugalingon nga buhi, og mao sa gihapon kagahapon, karon, ug hangtud sa kahangturan. Ayaw nila nga mahimong manununod uban ang mga tipaka; tungod pagasunogon man kana sila. Ang tanang mga uhot ug mga ingon-anang butang pagasunogon gayud. Taliabot na ang makina nga ig-aani aron giukon na pagawas ang Trigo. Gusto n'yong mamahimong Trigo.

¹⁶⁸ Adunay pipila kanila nga mga may sakit, ang pipila kanila nagmasakiton sa pisikal. Gusto ko nga mag-ampo kamo, agila. Iampo ninyo ang inyong igsoong lalaki, igsoong babaye nga agila dinha, samtang nagaampo pud ko para kaninyo dinhi. Hinaut nga mokunsad ang Espiritu sa Dios diha kaninyo.

¹⁶⁹ Timan-i, nga ang ginahatag ko kaninyo ang Pagkaon nga iya sa Agila, ang saad sa Dios. Ginatawag Niya ang Iyang mga propeta nga, "mga agila." Ginatawag Niya ang Iyang Kaugalingon nga "usa ka Agila." Siya'y Jehovah nga Agila. Ug samtang ginapandong ninyo ang inyong mga kamot diha sa usa'g usa, iampo ninyo sila.

¹⁷⁰ Langitnon namong Amahan, miingon ang Imong Pulong, nga ang ulahing sugo nga gihatag Mo sa Imong Iglesia, mao ang, "Panglakaw kamo sa tibuok kalibutan, ug iwali ang Maayong Balita," ang pangkinatibuk-ang mga sugo, "ang nagatoo ug nabautismohan maluwas; ang dili nagatoo pagahukman sa silot. Kini nga mga ilhanan maganunot kanila nga nagatoo; sa Akong Ngalan pagahinginlan nila ang mga yawa; magasulti sila og mga bag-ong sinultihan; kung makainom man sila og butang nga makahilo, dili kini makadaut kanila; kung makakupot sila og mga bitin, dili makadaut kanila ang mga niana; ug kung pandongan nila sa ilang mga kamot ang mga masakiton, mangaayo sila."

Oh Jehova'ng Agila, pakan-a ang Imong mga gagmay'ng agila karong gabhiona nianang Pulong, Ginoo. Nagkinahanglan sila. Mao kana ang pagkaon nga gikinahanglan nila. Mao kana ang kinahanglan nila, ang mahibaloan kung unsa ang Pagkaon, kung unsa ang MAO KINI ANG GINAINGON SA GINOO.

¹⁷¹ Gisaad Mo, nga kung ipandong nila ang ilang mga kamot sa usa'g usa, mangaayo sila. Oh Ginoong Dios, wagtanga ang tanang mga pagduhaduha ug mga ideya nga iya sa buitire gikan kanamo karon. Ug maalampoon kami nga nagakaon sa Pagkaon sa Agila, sa Pulong sa Dios.

¹⁷² Itugot nga ang matag mahugaw nga espiritu nga anaa niining mga tawo, matag espiritu sa pagduhaduha, matag espiritu sa kahadlok, ang pagpanghawid pa sa denominasyon, ang matag gawi, matag sakit, matag balatian nga anaa sa mga tawo, mobiya na gayud. Sa Ngalan ni Jesus Cristo, hinaut nga

mogula na kini gikan niini nga pundok sa mga tawo. Ug hinaut nga hilwas na sila sugod niining orasa, aron makaon na nila ang Pagkaon sa Agila nga ginatoohan namo nga Imong ipadala sa tibuok semana, Ginoo, og pagaablihan ang mga Selyo ug ipakita kanamo ang mga misteryo nga dugay nang gililong sukad pa sa pagkatukod sa kalibutan, sumala sa Imong gisaad. Sila’y mga Imo, Amahan. Sa Ngalan ni Jesus Cristo. Amen.

¹⁷³ Ang tanan nga nagatoo ug nagadawat, tindog mo, moingon, “Nagatoo ako. Nagadawat ako. Kung unsa man ang gisaad sa Dios kanako, dawaton ko.” [Nagatindog na ang kongregasyon nga may tingog sa pagdawat—Ed.]

Panalanginan kamo sa Ginoo. Maanindot kana. Nagatindog na ang matag tawo! Maayo kana.

Ang tono sa, *I Love Him*. Awiton nato kini nga alawiton para Kaniya kung ingon-ana, “Gihigugma ko Siya, gihigugma ko Siya tungod kay una Siyang nahigugma kanako.” Dungan ang tanan karon.

I love Him, (kung mao man, ipataas nato ang
atong mga kamot) I love Him
Because He first loved me
And purchased my salvation
On Calvary’s tree.

¹⁷⁴ Oh, dili ba Siya kahibulongan? [Nagaingon ang kongregasyon, “Amen.”—Ed.] Maglamano hay kita sa usa’g usa. Igsoong, agila, tuyok lang, igsoong babaye, maglamano hay mo, samtang ginaawit nato kini.

I love Him . . .

Igsoong, agila! Igsoong, agila! Igsoong, agila, nga nagawali sa Pulong! Charlie, kumusta ka? Panalanginan ka sa Dios, igsoon. Nalipay ko nga makita ka! Panalanginan ka sa Dios, igsoon. Panalanginan ka sa Dios, igsoong, agila. Panalanginan ka sa Dios.

On Calvary’s tree.

Ipataas nato pag-usab ang atong mga kamot ngadto Kaniya.

I love Him, I love Him
Because He first loved . . . (ug gihimo Niya
kamo nga agila)
And purchased my salvation
On Calvary’s tree.


¹⁷⁵ Unsaon man ninyo pagpakahibalo, unsaon man pagpakahibalo sa kalibutan nga gihigugma ninyo si Jesus? Kon ginahigugma nato ang usa’g usa. Sa ingon-anang paagi nga ang kalibutan . . . Kita n’yo, makita sa Dios ang inyong pagtoo; makita usab sa kalibutan ang inyong panglihok. Higugmaa ninyo ang usa’g usa. Pagbinuotan mo sa usa’g usa. Pakig-istorya mo sa usa’g usa. Magmapailubon kamo sa usa’g usa.

Ug unsa mang dugang pa nga mga pagtudlo nga among mahatag, sa bautismo man, pagtinguha sa Espiritu Santo... Wala man kita'y uban pa nga lawak dinhi para buhaton kana, og nakasabot man mo. Ang pagtawag sa altar, kung naaghat kamo sa Dios nga husto Kini, nga si Jesus Cristo mao sa gihapon kagahapon, karon, ug hangtud sa kahangturan, ug gusto ninyong magpasakop Kaniya, adto lang mo ug magpabautismo sa Iyang Ngalan, ugma. Aduna ma'y kalalaken-an nga magtudlo kaninyo. Unsa mang butang nga mahimo namo para makatabang kaninyo, buhaton namo kana.

I love Him, I love Him

Kamong mga nakakonekta sa telepono karon, sa Tucson, diha sa California, diha sa may Sidlakan, ipataas ang inyong mga kamot, diha sa...?... Dayega ninyo Siya!

Purchased my salvation

(Kinsa ma'y magpapauli? Ihatag ko na kang Igsoong Neville...?...) Bueno, hangtud ugma sa gabii, ihatag ko na kaninyo si Igsoong Neville, ang atong pastor. 

ANG BINHI DILI MANUNUNOD NGA UBAN ANG TIPAKA CEB65-0218
(The Seed Is Not Heir With The Shuck)

Kining Mensahe ni Igsoong William Marrion Branham, unang giwali sa Ingles niadtong Huwebes sa gabii, Pebrero 18, 1965, sa Parkview Junior High School sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apod-apod sa Voice of God Recordings.

CEBUANO

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org